

土岐文庫
文庫17
W 82
1



吳孟舉同選
自牧

宋詩鈔初集

錢吳氏藏



序

自嘉隆以還言詩家尊唐而黜宋宋人集覆瓿糊壁棄之若不克盡故今日蒐購最難得黜宋詩者曰腐此未見宋詩也宋人之詩

變化於唐而出其所自得
皮毛落盡精神獨存不知
者或以爲腐後人無識倦
於講求喜其說之省事而
地位高也則羣奉腐之一
字以廢全宋之詩故吟之
黜宋者皆未見宋詩者也
雖見之而不能辨其原流
則見與不見等此病不在
黜宋而在尊唐蓋所尊者
嘉隆後之所謂唐而非唐
宋人之唐也唐非其唐則

宋非其宋以爲腐也固宜
宋之去唐也近而宋人之
用力於唐也尤精以專今
欲以鹵莽剽竊之說凌古
人而上之是猶逐父而禰
其祖固不直宋人之軒渠

亦唐之所吐而不饗非類
也曹學佺序宋詩謂取材
廣而命意新不勦襲前人
一字然則詩之不腐未有
如宋者矣今之尊唐者目
未及唐詩之全守嘉隆間


固陋之本皆宋人已陳之
芻狗踐其首脊蘇而爨之
久矣顧復取而篋衍文繡
之陳陳相因千喙一唱乃
所謂腐也譬之膾炙翻故
出新極烹芼之巧則爲珍
美矣三朝三暮數進而
不變臭味俱敗猶以爲珍
美也腐乎不腐乎故臭腐
神奇從乎所化嘉隆之謂
唐唐之臭腐也宋人化之
神奇矣唐宋人之唐唐宋

之神奇也嘉隆後人化之
斯臭腐矣迺腐者以不腐
爲腐此何異狂國之狂其
不狂者歟萬曆間李蓑選
宋詩取其離遠於宋而近
附乎唐者曹學佺亦云選
始萊公以其近唐調也以
此義選宋詩其所謂唐終
不可近也而宋人之詩則
已亾矣余與家弟自牧所
選蓋反是盡宋人之長使
各極其致故門戶甚博不

以一說蔽古人非尊宋於唐也欲天下黜宋者得見宋之爲宋如此其爲腐與不腐未知何如而後徐議其合黜與否或繇是而疑此數百年中文人老學游居寢食於唐者不翅十倍後人何獨於嘉隆之說求一端之合而不可得因忽悟其所以然則是集也未必非唐以後詩道之巫陽也夫

告

康熙辛亥仲秋之朔洲錢
吳之振書於鑑古堂



敘

雲巖柴望撰

方今風雅道盛不啻戶詩
家人騷客矣其境日盡則
其致日新而皮見者謂為
得之於宋詎知三百以還

具天地秀傑之氣以生者
類能形容刻畫啓未發之
精以成爲一人一代之作
而必內宋而外唐是何異
昔之內竟陵而外七子爲
文人習氣乎揆厥所由要
皆有新之見者存也夫三
統相繼必踵乎前代而進
退之而升降損益究爲運
會所適然善作者亦無庸
預乎其際歷古今皆一軌
則陳陳者廢且絕寧待今

日哉河梁十九首尚矣初
盛以高渾爲氣格中唐號
爲嫺雅降及晚唐則以雕
刻取致卽唐一代之詩且
遞變若此而欲以之範宋
人可乎宋固有宋之詩也
宋又不一宋也宋以後莫
不有然其孰使之而然卽
四時亦何不然春秋代謝
乍菀乍枯菀枯者不知也
執一之論烏乎其當人意
也就一人之身而論少之

所得比壯而厭棄之壯之
所得比老而厭棄之其推
移又四時若也因其所適
然而發之爲詩弗錮師說
弗叅已見卽好新者之喙
可窒而生平所沉浸亦可
遞爲遷矣宋四名家之刻
得毋猶有新之見者存乎
夫新故何常之有始以獨
造爲新繼以間出爲新終
且以雷同附和爲新故其
所長新與新其所必故皆

不明於運會適然之故者
也四家之詩長新之物也
推而上之四唐何常不新
推而上之漢魏六朝又何
常不新堦周子暨兒升獨
欣然有是選重懼世之以
洩泄爲零陵香者其果不
謬戾古人異於今之好新
者耶樂其志於風雅也爰
弁之以辭



宋詩鈔初集目錄

王禹偁 小畜集

徐鉉 騎省集

韓琦 安陽集

蘇舜欽 滄浪集

張詠 乖崖集

趙抃 清獻集

梅堯臣 宛陵集

余靖 武溪集

歐陽修 文忠集

林逋 和靖集

石介 徂徠集

宋詩鈔初集目錄

香噴樂其志欲風靡也
豈與古人異欤今之我
豈斷為零刻香香其果不

孔武仲 清江集

孔文仲 清江集

孔平仲 清江集

韓絳 南陽集

王安石 臨川集

蘇軾 東坡集

小畜集鈔

王禹偁字元之濟州鉅野人九歲能文太平興國八年

進士授成武主簿徙知長洲縣端拱初召試擢右拾遺

直史館拜左司諫知制誥坐劾妖尼貶商州團練使量

移解州進拜左正言直弘文館出知單州尋召為禮部

員外郎再知制誥至道元年入翰林為學士知審官院

兼通進銀臺封駁司又坐謗訕罷為工部郎中知滁州

揚州召還知制誥又坐實錄直書出知黃州徙蘄州而

卒年四十八今有小畜集六十二卷紹興丁卯沈虞卿

所編也當時元之自編按其序則三十卷宋史言二十

卷脫誤也元之詩學李杜故其贈朱巖詩云誰憐所好

還同我韓柳文章李杜詩學杜而未至故其示子詩云



本與樂天為後進敢期子美是前身是時西崑之體方
盛元之獨開有宋風氣於是歐陽文忠得以承流接響
文忠之詩雄深過於元之然元之固其濫觴矣穆修尹
洙為古文於人所不為之時元之則為杜詩於人所不
為之時者也

酬种放徵君一百韻

太歲在辛卯九月萬木落是時太陰虧占云臣道剝王生
出紫微譴逐走商洛扶親又抱子迤邐過京索弊車載詩
史病馬懸囊索西都不敢住空負香山約閣卿正南路秦
嶺峭如削肩輿碍巨石十步三四却妻孥亦徒步積礫不
名脚山店蓋木皮烟火渾薰灼夜深聞鬻虎合家屢驚懼
山泉何縈回切裂無橋約卸鞍引羸蹄解襪事芒屨晨澗

河鑿朝涉照如勘商山六百里天設皆岩嶠上洛在其
中登牢曾未若逐臣自可死何必在遠惡刺史不我顧古
寺野淹泊卜居雜民畔致養無精繫知道由自寬有親強
為業側聞种先生終南卧雲經長沮既躬耕元禮仍開學
王績婦未娶介潔翹孤鶴之推毋偕隱教誨修天爵詩情
亦嗜酒道氣不服藥田衣剪荷芟野飯烹菹葑霧豹澤文
彩冥鴻避贈繳官從羔雁聘唯恐簪裾縛如何宋右史斥
鷓鴣起居舍人宋維翰奏种放隱居終南乞量才錄用頗為識者所笑玄纁與丹詔
恩禮誠非薄仍勅京兆府敦諭辭恭恪先生戀板輿純孝
心堅確散髮走烟巒拜章謝恩渥巨材猶在澗大玉不出
璞使者遂空回軟輪何寂寞賢母召徵君庭責詞嗃嗃胡
為事章句漏名入街郭府縣汚我山胥徒諫吾幄以茲近

聲利安得成高邈誓將徙窮各庶可逃誼濁先生拜引過
為壽開樽杓陶陶又熙熙何啻聞竽籥人傳到遷客面目
頓漸作器小識不遠當年事頭角遭時得一第游宦何離
礙逐羶甚蚍蜉鬪耀同蝟螭宰邑乏絃歌諫垣無謬諤便
番朱紫綬借黍絲綸閣方號駸駸危已困狴狴徒待罪始
知非咄哉昧先覺一聆高世行罪髮庸可擢忍耻賦三章
塵埃寄一作望寥廓明年會恩宥量移升蛙躍靡暇謁南山征
途望西嶽黃河波洶湧白徑茗班駁中條圍解縣五老烟
蟲蠹此焉為郡副身敢事隕穫龍禽幸未死尚且謀飲啄
米呼村婢春樵顧山童斫飼馬粹寒蕪看書熟秋穰信口
亦吟哦放心無適莫君恩已絕望人事終難度相府一張
紙喚起久屈雙誠知有梁棟未忍弃榱桷五城天上開三

殿雲間卓重取政衣冠籠裹山猿獲病翼得風雲壞墻勞
藉望諫官與史氏舊職盼羈絡舉袖拂石螭凝眸睨金雀
冥心想前事一夢何揮霍長恐先生聞倚松成大噱關中
朋友來遺我神仙作繁華遠容綺錚鏦美金錯古澹啜劔
羹大雅鏗木鐸千言距百韻旨趣何綽綽孰念氣如虹翻
然輕抵鵲俊甚麻姑爪快比屠門嚼渾金豈在鎔尺璧寧
施琢愈風齊捧檄忘味同聞樂置之向懷袖日夕芬蘭若
褒我塵俗韻鉛刀化干莫同聲必有應過實還疑謔盛夸
山中事雲屋張霞幕蘭茆含露採石髓和煙酌巢山泉滌
耳園綺芝盈握有時上絕頂星斗近可摸下視塵世人營
營似蠱蠟男兒既束髮出處岐路各苟非乘陶鈞卽去持
矛槊致主比唐虞安邊如衛霍不爾為逸人深居返吾朴

胡然自碌碌名節亦銷燦行年過半世功業無圭勺無術
鑄五兵使民興錢鎊無才統六師逐寇開沙漠空言說王
道肆目看人瘼多慚指佞草虛效傾心藿一覽大雅文起
予亦何博况茲山野性謨畫昧方略搔首謝朝簪行將返
耕鑿

寄題陝府南溪兼簡孫何兄弟

甲湖在陝服自昔名所重許昌擅唐律人口尚傳頌舊迹
固藜莠勝槩猶出衆前年謫商于過此方憂恐無暇濯溪
泉惻惻心甚痛量移遇恩宥方寸稍放縱故人孫漢公勤
懇事迎送柅車得三宿延我入溪洞春殘尚有蝶夏首始
見竦朱櫻實頗煩黃鳥聲亦弄地幽接府署亭高瞰村壟
縈砌水逶迤入簷山龍從鯉翻自躍金蝸篆燒餘汞石危

君子介筍亂小人勇虛涼集鷗鷺爽塏無蚊蠓芟葉巧如
剪萍根密非種逕苔白斑駁岸草玄菟萃官醞綠開瓶時
果青出籠醉中猛別復依約似一夢唯愁當要路時仗棲
關茸解梁雖近山坑塢費耕種常風自盪南日夕塵塢捧
雲泉既遼遠草樹非秀聳况茲炎蒸月繫縛何所動緬懷
八龍會南溪與誰共撮萼本多才甘棠應少訟枕簟與琴
書鴿原聊自奉篇章取李杜講貫本姬孔古文閱韓柳時
策聞晁董清吹席上來當暑開冰凍菱脆擘瓊枝瓜甘浮
蜜箭氣秋緣篠戰露覩圓荷捧照湖小賀監溪堂輕馬摠
此景且不同此懷可長勸平生好泉石况復官散冗近聞
田紫微漣水許就俸田舍人量移軍州表援例苟得請甲
湖當日用終老占溪居卧看秋泉湧

七夕 商州作

去年七月七直廬開獨坐西日下紫垣東窓昏青瑣露柳
蛸忽鳴風簾燕頻過寂寂紅藥堦槿花開一朵時清無詔
誥性淡忘物我兀然何所營橫枕通中卧夢入無何鄉蛺
蝶甚么麼孰謂處深岩自得放慵情中官傳宣旨御詩令
屬和驚起儼衣冠拜舞蒼苔破逸翰龍蛇走雅調金石播
洋洋治世音乃賡強牽課暮隨丞相出自謂天上墮歸來
備乞巧酒肴間瓜果海物雜時味羅列繁且夥家人樂熙
熙兒戲舞娉娉寵辱方若驚倚伏忽成禍九月謫商于羈
縻伏窮餓鳳儀因鴟嚇驥足翻驚跛山城已僻陋旅舍甚
叢脞夏早麥禾死春霜花木挫吾親極衰老吾命何輒軻
稚子啼我前孺人病我左玄髮半凋落紫綬空垂拖客計

魚脫泉年光蟻旋磨昨夜枕簟涼西郊忽流火河漢勢瀉

淺牛女姿婀娜商土本礲磽商民久勞瘁霜旱固不支水

潦復無奈今歲商山秋大水居人且艱食行商不通貨郡小數千

家今夕惟愁阿吾兒索來禽即林擒傾市得一顆舉家成大

笑愁眉略舒躡自念一歲間榮辱兩偏頗賴有道依據故

得心安妥窮乎止旅人達也登王佐匏瓜從繫滯糠粃任

揚簸批鳳不足言失馬聊自賀委順信吾生無可無不可

不見陽城驛 并序

予為兒童時覽元白集唱和陽城驛詩時稹貶江陵過

南山感陽道州而作是詩也且改驛為避賢郵不忍呼

其諱也樂天在翰林得而和之又見杜紫微富水驛詩

題下解云富水驛舊名與陽諫議同卒章曰驛名不合

輕移改留警朝天者惕然淳化二年九月予自西掖左
官商于訪其驛則無有也檢之圖經求之郡境則富水
地存而驛廢陽城之號遂莫知矣因作古風詩申明三
賢之作且以不見陽城驛爲首句至于道州之行事元
詩盡之矣此不復云

不見陽城驛空吟昔人詩誰改避賢郵唱首元微之微之
謫江陵顛顛爲判司路道商山驛一夕見嗟咨所嗟陽道
州抗直貞元時時亦被斥逐南荒終一麾題詩改驛名格
力何高奇樂天在翰林亦知遷客詞遂使道州名光與日
月齊是後數十年借問經者誰留題官田水驛始見杜紫薇
紫薇言驛名不合輕改移欲遣朝天者惕然知在茲一以
諱事神名呼不忍爲一以名警衆名存教可施爲善雖不
同同歸化之基邇來又百稔編集空鱗差我遷上洛郡罪
譴身繫維舊詩猶可誦古驛殊無遺富水地雖在陽城名
豈知空想數君子貫若珠累累三章詩未泯千古名亦垂
德音苟不嗣吾道當已而前賢尚如此今我復何悲題此
商于驛吟之聊自怡

感流亡

謫居歲云暮晨起厨無煙賴有可愛日懸在南榮遷高春
已數丈和暖如春天門臨商于路有客憇簷前老翁與病
姬頭髻皆皤然呱呱三兒泣惻惻一夫鰥道糧無斗粟路
費無百錢聚頭未有食顏色頗飢寒試問何許人答云家
長安去年關輔旱逐熟入穰川婦死埋異鄉客貧息故園
故園雖孔邇秦嶺隔藍關山深號六里路峻名七盤襁負

且乞丐凍餒復險艱惟愁大雨雪殭死山谷間我聞斯人
語倚戶獨長歎爾爲流亡客我爲冗散官在官無俸祿奉
親乏甘鮮因息筮仕來倏忽過十年我冠蠹黔首旅進長
素餐文翰皆徒爾放逐固宜然家貧與親老覩爾聊自寬

竹鼯

商嶺多修篁蒼翠連山谷有鼠生其中薦食無厭足春筍
齧生犀秋筠折寒玉飮飽致肥膾優游恣蕃育林密寫不
攫穴深犬難逐鳳皇餓欲死彼實無一掬唯此竹間鼯琅
玕長滿腹暖戲綠叢陰舉頭傲鴻鵠不知商山民愛爾身
上肉有錘利其鋒有錐銛于鏃開穴窘如囚洞胸聲似哭
膏血尚淋漓攜來入市鬻竹也比賢良鼠兮類商俗所食
旣非宜所禍誠知速吁嗟狡小人乘時竊君祿貴依社樹
神俸盜太倉粟筮簣佞舌鳴藥石嘉言伏朝見乘大權夕
聞罹顯戮李斯具五刑趙高夷三族信有司殺者在暗明
與燭彼狡無害賢彼鼠無食竹

送筇杖與劉湛然道士

有客遺竹杖九節共一枝鶴脰老更長龍骨乾且奇我問
何所來來從西南夷因息漢武帝求此民力疲明明聖天
子德教嘉四維蠻 盡臣妾縣道皆羈縻爨僮與笮馬入
貢何累累此竹日以賤輕視如蒿藜我年三十七血氣未
全衰况在紫微垣動爲簪笏羈倚壁如長去聲物歲月無所
施寸心空愛惜惜此來天涯忽承明主詔來謁太乙祠再
見劉先生氣貌清且羸持此以爲贈所謂得其宜少助橘
童力好引花鹿隨步月莫離手看山聯搢頤微物懶致書

故作筇竹詩

對雪

帝鄉歲云暮衡門晝長閉五日免常參三館無公事讀書
夜卧遲多成日高睡睡起毛骨寒窻牖瓊花墜披衣出戶
看飄飄滿天地豈敢患貧居聊將賀豐歲月俸雖無餘晨
炊且相繼薪芻未闕供酒肴亦能備數杯奉親老一酌均
兄弟妻子不飢寒相聚歌時瑞因思河朔民輸挽供邊鄙
車重數十斛路遙數百里羸蹄凍不行死轍冰難曳夜來
何處宿聞寂荒陂裏又思邊塞兵荷戈遇 騎城上卓旌
旗樓中望烽燧弓勁添氣力甲寒侵骨髓今日何處行牢
落窮沙際自念亦何人偷安亦如是深為蒼生蠹仍尸諫
官位謬誤無一言豈得為直士褒貶無一詞豈得為良史
不耕一畝田不持一隻矢多慚富人術且乏安邊議空作
對雪吟勤勤謝知己

送朱九齡

吏隱不求貴親老不擇祿之子有俊才弱冠中正鵠弗墜
先人業何慚有道穀一命佐礪山枳棘聊容足再命宰嘉
興絲桐幾易俗率身甘菜茹養母求梁肉承顏苟不虧折
腰未為辱解印無餘貲舟中只琴筑十口寄淮泗一身來
輦轂又說東南行秋風江水淥鄱陽古名郡赤金流山谷
每歲鼓錢刀從來設官局還得便高堂無辭縻逸躅颺帆
江湖息木脫天地肅楓葉紫爛熳蓼花紅景嶽津吏曉來
迎溪僧夜留宿至止事方簡優游從所欲江城豐稻梁水
市多魚菽三載奉甘飴百錢飽家族自有綵衣華勿嘆藍

袍綠行年未三十氣壯顏如玉行義日以聞焉能長碌碌
終列侍臣班耀我同年錄且賦白華詩唱作離筵曲

暴富送孫何入史館

孟郊嘗貧苦忽吟不貧句為喜玉川子書船歸洛浦孟郊有忽不貧喜盧仝
書船歸洛詩乃知君子心所樂在稽古漢公得高科不足
惟墳素二年佐棠陰眼黑怕文簿躍身入三館爛目閱四
庫孟貧昔不貧孫貧今暴富暴富亦須防文高被人妒

送馮尊師

時馮再為拾遺

前日訪潘闈下馬入窮巷忽見雙筓石卧向青苔上云是
馮尊師秋來留在茲今說東南行問我堅乞詩又見宋閣
老亦言詩甚好欲去天台山即別長安道臺閣有羣英贈
別瑰與瓊琤然滿懷袖此事殊為榮安用徵吾句吾道方

翻語老為八品官有山未能去束髮號男兒出處貴得宜
出則學皋夔獨立稱帝師處則同喬松決起如冥鴻誰能
似蚯蚓蟠屈泥土中師行甚可羨雲鶴無羈絆為我持此
詩題于桐柏觀

庶子泉

物趣同天造物景不自勝泉乎未遇人石罅徒流迸官相
政多暇行樂躡岩磴發蒙漲為溪幽致茲焉盛唐賢大曆
後峭壁刻名姓我來一何暮今秋始乘輿山勢環有缺山
門壺引柄乍挹清泚香頗愜幽閑性味將春茗宜光與曉
嵐暝架竹落僧厨遠聲入晴磬何當宿禪室欹枕終夜聽
飲多病骨換照久塵襟迥銷盡謫居愁無心治歸艇

陽水篆

冷冷庶子泉落落陽水筆雲氣勢奔垂龍蛇互蟠屈嶧山
旣廟滅石鼓又缺失唯茲數十字道勁倚雲窟模印徧華
流傳耀緗帙書誠一藝爾小道詎可忽乃知出人事千
古名不沒

東門送郎吏行寄承旨宋侍郎

西門送僕射鞍馬照落光南門送貳卿冠蓋遙相望東門
送郎吏艤舟隋隄傍郎吏誠隔品同直白玉堂丈人况知
已振拔在舉揚攜手惜我去滋勸離別觴醉中不記事烟
水空茫茫醒來聞鳴櫓嘔軋獨一傷猶疑在禁中殘漏寒
丁當迴望銀臺間五雲遮帝鄉衆散今如此升沉庸何傷
丈人名位峻只欠登岩廊平居倦朝請高論息退藏園田
有別業古木羅修篁覃亭寒蕭蕭池波碧泱泱嘗云拂袖
去可以傲羲皇丈人果能爾識度非尋常安車比踈廣辟
穀如張良再拜願丈人壽考乃康強自念山野士不解隨
圓方宦途多齟齬身計頗悲涼行將解簪笏歸去事農桑
幸容操履杖洒掃循丘墻

北樓感事

有序

唐朱崖李太尉衛公爲滁州刺史作懷嵩樓取懷歸嵩
洛之義也衛公自爲之記其中述直翰林時同僚存沒
且有白雞黃犬之歎頗露知退之心及自滁徵拜再秉
釣軸卒以怙權賈禍貶死海外則向之立言誠空文爾
皇宋至道元年夏五月僕自翰林學士尚書禮部員外
郎知制誥除工部郎中知滁州軍州事到郡之日訪衛
公舊迹樓之與記皆莫知也而郡有北樓通刺史公署

登眺終日甚亦自得作北樓感事詩以見意

北樓出林杪登覽開病姿旁帶滁州城雉堞何逶迤下入

刺史宅却臨統軍池孟統軍作小池在樓下伊予翰林客失職方在

茲兩衙部領外盡日吟望時晚窓度急雨夏木交繁枝淮

南氣候殊經秋轉黃鸝簷前有山果採掇亦甘滋樽中有

官醞傾酌任醇醑忘機得真趣懷古生遠思念昔李太尉

落落邦家基下筆到西漢料兵如六奇謫官來此郡鬱鬱

持一麾嘗在懷嵩樓記文悲盛衰甚得進退理深明禍福

機未幾再入用斯言忽如遺君恩匪膠柱天殃若影隨六

月萬里行炎荒竟不歸功成又名遂不退將安之姑以人

事較勿憑天命推矧予草澤士被褐復羹藜謬因弄文翰

八載侍丹墀三入承明廬古人期並馳玉堂百日罷所累

非文辭強仕未爲老望郎不爲卑淮邊永陽郡人物自熙

熙費用量所入豐約從其宜一妻本糟糠不識金翠施三

男無庶孽詎愛紈綺貲甘貧絕誅求易退無羈縻五十擬

歸耕何必懸車期且予望衛公雲龍與山麋唐賢昔際遇

文雅道光輝進士取將相易于俯拾棊自從五代來素風

已陵遲干戈爲政事茅土輸健兒儒冠筮仕者僅免寒與

飢至今明聖代此風猶未移自無經濟術焉能碌碌爲歸

歟復歸歟無忘北樓詩

官醞

爲郡得官醞月給盈三斛地僻少使車時清罕留獄老大

復遷謫吾懷頗幽獨嬋娟樓上月爛熳池邊菊東院與西

亭脩脩風弄竹對此不開樽騷人應慟哭獨酌入醉鄉陶

小畜集卷十一
十一
朕暝雙目醒來成浩歎胡爲事口腹羹酒書垂戒羣飲聖
所戮漢文亦禁酒患在糜人穀自從孝武來用度常不足
推醢奪人利取錢入官屋古今事相倍帝皇道難復吾無
奈爾何更盡杯中滌

黑裘

野蠶自成繭綠密爲山紬此物產何許萊夷負海州一端
重數斤裁染爲褻裘守黑異華侈崇儉非輕柔燠香則無
取風雪曾何憂朝可奉冠帶夜以爲衾裘一作晏嬰三十
年度幾跡相伴季子歎貂弊吾服已爲優不取狐貉者亦
當師仲由况我屢遷謫行採賡歌謳映髮垂鷲頂植杖昂
鳩頭袖寬可以舞老農卽爲儔不曳銀臺門任爾爭封侯

聞鴉有序

滁淮地也郡堞之上鴉鴉集焉

永夕鳴嘯不已妻

子驚死或終夜不寐因作詩以喻

徵前賢放道而

聞是

摠而述云以見吾志

元精自萬彙羽族何茫茫爲怪有鴉鴉爲瑞稱鳳皇鳳皇
不時出未識五色章吾生在鄒魯風土殊遠方鳴鳩隨乳
燕日夕巢吾梁翩翩雜鳥雀比屋率爲常又從筮仕來五
年居帝鄉更直入承明侍宴夜未央上林聞鶯囀巧舌如
笙簧鴉鴉徒知名聞見實未嘗頃年謫商山聽之已悲涼
今茲出內庭罰郡來永陽誰知爾鸚鵡營巢在城墻年加
睡漸少秋盡漏且長鳴嘯殊不已歷歷含微霜孺人泣我
右稚子啼我傍吾心非達士詎免亦悵悵人生縱百歲忽
若石火光其間有窮通幽昧難自量我愛皋與夔峩冠虞

舜堂簫韶聞九成丹穴來鏘鏘尺愛閣與散陳力遇文王
鸞鸞聽岐山多士周道昌嗟嗟漢賈誼年少謫南荒故有
鵬鳥賦倚伏理甚詳郇公暨鄴侯放逐同一邦夜深聞此
鳥韋公涕沾裳李侯舉酒令斯音非不祥坐客如不聞罰
之以巨觴遂使惡聲鳥聽之無所傷天寶中韋郇公謫守
新州時李鄴侯亦以
處士放逐因夜飲聞鵙鳴韋公泣下李公曰此鳥人以爲
惡其聲可聽乃令坐客有不聞其聲者罰以大杯由是聽
之不贊皇貶袁州懷鵙義亦臧李太尉有
懷鵙賦乃知昔賢哲未
免亦悽邁况予不肖者邀寵在朝行報國惟直道謀身昧
周防四年兩度黜髣髴已蒼蒼雖得五品官銷盡百鍊鋼
何茂解印綬歸田謝膏梁教兒勤稼穡與妻甘糟糠鳳來
非我慶鴟集非我殃優游盡天年身世俱可忘

甘菊冷淘

經年厭梁肉頗覺道氣渾孟春致齋戒勅厨惟素飧淮南
地甚暖甘菊生籬根長芽觸土膏小葉弄晴暎采采忽盈
把洗去朝露痕俸麪新且細漉牢如玉墩隨刀落銀鏤煮
投寒泉盆雜此青青色芳香敵蘭蓀一舉無子遺空媿越
盥存解衣露其腹稚子爲我捫飽慚廣文鄭飢謝魯山元
廣文先生飯不足
元魯山飢而死况我草澤士藜藿供朝昏謬因事筆硯
名通金馬門官供政事食久直紫薇垣知制誥給政事
食自小許公始誰
言謫滁上吾族飽且温既無甘旨慶焉用味品煩子美重
槐葉直欲獻至尊事見杜工部
槐葉冷淘詩起予有遺韻甫也可與言

訓楊遂

楊君江左士文律何飄飄人言未冠時作賦陵洞簫甲科
中南國江南狀元及第通籍趨東朝入中朝爲贊善軼軻位不進陶潛還

折腰復為宰邑向蜀道萑蒲忽興妖官小力不支犇竄避
搶刀朝廷責守土黜入縣佐僚昨朝寫孤憤遺我有客謠
伊予亦左遷諷之心無慘人生一世間否泰安可逃但問
道何如未必論卑高自古富貴者撥亂如藜蒿德業苟無
取未死名已消豈期顏子淵不在一瓢推此任窮達其
樂方陶陶達則為鷓鴣窮則為鷦鷯垂天與巢林識分皆
逍遙

和楊遂賀雨

我罷內廷職出臨永陽民永陽民雖庶未免多飢貧富之
既無術齷齪為謹身可堪今夏旱如燎復如焚厥田本塗
泥坐見生塵氛稚老無所訴嗷嗷望穹旻食祿憂人憂早
夜眉不伸從決獄中囚徧禱境內神楚辭有山鬼廟貌羅

水濱 法有浮圖寺宇連城闔齋莊命寮案供給抽俸緡
鼓笛迎湫水香花照金輪誠知非典故且慰旱爍人偶與
天雨會霧霏四郊勻插秧復修堰野叟何欣欣可辦官府
調亦免農艱辛燮調賴時相感應由聖君子吾復何有敢
望歌頌云清流楊水部德與我為鄰仇香官位屈何遜詩
格新見投賀雨詩言自人口聞夫君蓋私我過實豈相親
為霖非我事職業惟詞臣若有民謠起當歌帝澤春庶使
採詩官入奏助南薰

揚州寒食贈屯田張員外成均吳博士同年殿省柳

丞

前年寒食節待詔直內庭休假百官出獨掩深嚴扃近侍
不敢醉賜酒空滿餅閑就通中枕時聞索上鈴息入無何

鄉兀然欲忘形去年寒食日滁上黍專城山歌喧里巷春
物媚池亭永陽溪水綠琅琊山色青謫宦自消遣不敢誇
獨醒往往取官醞時時對花傾醉來念身世翻使淚縱橫
今年蒞淮海時節又清明對案有留事聽歌無歡聲胥徒
費簿領使客煩送迎狴牢未空歇堰埭勞修營衰病力不
支懶慢性已成虛花滿雙目素髮添數莖酒肴畧無味妓
樂固難聽誰言寒食下終日取茶烹屯田布素交屈此關
市征昔年同應舉典衣飛巨觥博士東觀客求官得步兵
况且丹陛前同爲出谷鶯殿丞尹我邑桑梓復弟兄吏隱
掌巖茗終朝談道經三賢宴會少七夕休假并何不策我
馬廢苑尋流螢何不蕩我舟樓臺訪摘星三春景欲盡九
曲波始平居然逼吏後頓此阻交情老態厭春華病身憂
宿醒如水若不改藉糟亦胡寧解印蓄素志吟詩露丹誠
維揚非所愛有便卽爲耕

揚州池亭卽事

冥心閱羣動亦各趨所安胡爲名利人戚戚常鮮歡吾生
四十四結珮吁郡官掌言入綸閣待詔直金鑾匪謂得祿
少所嗟行道難前年謫滁州憂時雙鬢殘賴有琅琊溪時
濯塵纓冠朝僉徒淮海任重力易殫君恩詎可報感激涕
洸瀾民瘼不能治惻隱情悲酸况復多病身名宦心已關
歸田未果決懷祿尚盤桓公退何所適池亭一凭闌旭日
媚春弄微風生鳴湍呵僮勿挾彈留客不持竿用冀魚鳥
馴熙熙肆游觀神仙未可學吏隱聊自寬孤吟刻幽石此
義非考槃

一品孫鄭昱

鄭綱元和中拜相至鄭昱六世矣

卜葬得假官南出安上門鞭馬六十里暮授中書村村翁
館我宿茆屋欲黃昏有客忽投刺自稱一品孫氣貌不凡
俗因為開酒罇坐久問家謀其族大且繁池州有清節濫
觴發洪源大傅擅鴻筆入相又出藩其家本開封改號一
何尊至是始六代布衣老丘樊跨驢入府縣驅犢耕郊原
家廟固已毀國史空具存盛德百世著功必格乾坤高大
已不祀羨網何可論况復起章句乘時寵便蕃子孫雖替
後尚得守田園我愛三代時法度有深根卿大夫稱家世
世奉蘋蘩四民有定分宦路無馳奔自從雜霸道傾奪日
喧喧脫未乘金鉞吮筆乘朱軒朝榮暮又辱容易如掌翻
古道不可仗頽波益以渾何况度木者倒置輪與轅我亦
起白屋兩朝直紫垣蔭子有冠裳賞延弟與昆盡待食人
祿將何報君恩農桑國之本孝義古所敦五族不力穡終
歲飽且溫雖非享富貴亦以蠹黎元唐賢尚消歇我輩奚
足言呼兒諷此詩播在篋與笈

月波樓詠懷

有序

月波之名不知得于誰氏圖綴故老皆無聞焉因作古
詩一章凡六百八十字陷于樓壁庶使茲樓之名得與
詩俱不泯也

郡城無大小雉堞皆有樓其間有名者不過十數州吹簫
事遼迥仙迹難尋求庾公在九江締構何風流謝守鎮宣
城疊嶂名有由東陽敞八咏吾聞沈隱侯白雪架郢中調
高誰和酬黃鶴倚鄂渚仙去事悠悠贊皇謫滁上作賦懷

嵩丘樓居出俗態澤國多勝遊好景不遇人安得名存留
齊安古郡廢移此清江頭築城隨山勢屈曲伏環周茲樓
最軒豁曠望西北阨武昌地如掌天末入雙眸平遠無林
木一望同離婁山形如八字會合勢相勾東晉方士戴洋言武昌有山無
林山形八字勢不及九故孫權以三國事既遠六朝名亦
黃武元年初武昌八年遷建業休近從唐末來爭奪互仇仇斯樓備矢石此地控咽喉終
朝望烽燧連歲事戈矛可憐好詩景牢落無人收皇家統
萬國遠邇盡懷柔三聖四十年蕩蕩文德修淮甸為內地
黃岡為上游儒冠假郡印踐更若公郵况多辦職吏誰官
恣吟謳伊余何為者竊慕騷人儔兩朝掌文翰十年侍冕
旒去歲出西掖謫居抱窮愁日日江樓上風物得冥搜何
人名月波此義頗為優西南新桂魄初上懸玉鉤晚瀨清

且淺漂蕩影沉浮三五金波滿夜光如暗投驪龍弄頷珠
晃朗照汀洲澹臺披寶劔碎壁斬長虬冰輪曉入地推下
赤金毬闌干四五星斜漢印清秋誰家上元燈兒盛剗菰
蘆此景吟不出謾使聲呦呦千里畫圖濶四時詩興幽野
花媚宮纈芳草鋪碧袖火雲照沙浦暴雨傾瓦溝白亂蘆
花散紅殷藜穗稠簷水垂若練雪片大于鷗江籬煙漠漠
官柳雨颺颺舟子斜盪槳牧童倒騎牛水獺有時戲江豚
頗能泗山鳥奏竽籟落霞展衾稠魚網雪離離酒旗風颺
颺旅懷雖自適詩物奈相尤右顧徐邈洞精靈如在不在
暇伍員廟荒隙令人羞樓中何所有官醞湛蚍蜉棋枰留
客坐琴調待僧抽橘苞鄰藥鼎墨筆間茶甌平生性幽獨
寂寞誰獻酬官常已三黜懷抱罹百憂凭闌憶王粲望闕

同子牟自甘戍潦倒無復事聲猷身世喻泡幻衣冠如贅
瘤放意無何鄉誰分親與仇寓形朝籍中毀譽任啁啾君
恩無路報民瘼無術瘳唯慙戀祿俸未去耕田疇題詩郡
樓上含毫思義猷功名非范蠡何必泛扁舟

十月二十日作

是日甚寒始有木

重衾又重茵蓋覆衰爛身中夜忽涕泗無復及吾親須臾
殘漏歇吏報國忌辰陵旦騎馬出溪水薄潏潏路傍飢凍
者顏色頗悲辛飽暖我不覺羞見黃州民昔賢終祿養往
往歸隱淪誰教為妻子頭白走風塵修身與行道多媿古
時人

成武縣作

釋襦來成武初官且自強位卑松在澗俸薄葉經霜雨菌

生書案飢禽啄印牀猶驚寫秋卷枕砌落花黃

寄碭山主簿朱九齡

忽思蓬島會羣仙二百同年最少年利市襦衫拋白紵風
流名紙寫紅牋歌樓夜宴停銀燭柳巷春泥汚錦韉今日
折腰塵土裏共君追想好淒然

寄魚臺主簿傅翹

聽說魚臺景最奇鮑參軍到語多時時林法椽來自魚臺
因言烟水之典故有
此天晴綠野懸魚網木脫空城露酒旗錦擲鮮鱗紅撥刺
雪翻寒鷺白離裊仍誇縣尹風騷客應有秋來唱和詩

寄寧陵陳長官

吏隱寧陵縣琴堂枕古河家山隔江遠風雨過船多假日
親尋藥公庭自種莎相逢如舊識執手動勞歌

寄金鄉張贊善

年少辭榮自古稀，朝衣不着着斑衣。
北堂侍膳侵星起，南畝催耕冒雨歸。
種竹野塘春笋脆，採蘭幽澗露牙肥。
伊予自是徒勞者，未得同尋舊釣磯。

遊虎丘山寺

寺墻圍着碧孱顏，曾是當年海湧山。
盡把好峰藏院裏，不教幽景落人間。
劔池草色經冬在，石座苔花自古斑。
珍重晉朝吾祖宅，一迴來此便忘還。

寄獻潤州趙舍人

南徐城古樹蒼蒼，衙府樓臺盡枕江。
甘露鐘聲清醉榻，海門山色滴吟窓。
直廬久負題紅藥，出鎮何妨擁碧幢。
聞說秋來自高尚，道裝節竹鶴成雙。

記言彩筆罷攜華，郡閣高閑似道家。
琴院坐聽江寺磬，郡樓吟見海山霞。
春園遺母親燒笋，夜榻留僧自煮茶。
應笑陶潛未歸去，折腰奔走在泥沙。

寄毗陵劉博士

毗陵古郡接江垸，赴任琴書共一船。
下岸且尋甘露寺，到城先問惠山泉。
秋蟾吐檻供吟興，野鶴偎床伴醉眠。
官散道孤詩筆老，不應雙鬢更皤然。

除夜寄羅評事同年二首

歲暮洞庭山，知君息浩然。
年侵曉色盡，人枕夜濤眠。
移棹風搖浪，開窓雪滿天。
無因一乘輿，同醉太湖船。
郡僚方賀正，獨宿太湖稜。
堦下羞爲吏，船中祇載僧。
折梅和薄雪，煮茗對孤燈。
應笑排衙早，寒靴踏曉冰。

春日官舍偶題

薄宦苦流離壯年心已衰
鶯花愁不覺風雨病先知
曉月晃竹屋寒苔疊
籬籬無人慰幽寂
庭柳自低垂

寄獻翰林宋舍人

金鼎鹽梅偶未和
位高猶說野情多
官墻月上開琴匣
道院風清响藥羅
留客旋燒含露筍
倩僧教種耐霜莎
孤寒知有爲霖望
未忍江頭釣綠波

吳江縣寺留題

松江江寺對峰巒
檻外生池接野灘
幽鷺靜翹春草碧
病僧閑說夜濤寒
晨齋施筍惟溪叟
國忌行香祇縣官
盡日門前照流水
塵纓渾擬濯沈瀾

中元夜宿余杭山仙泉寺留題

祭廟迴來略問禪
蘚墻莎徑碧山泉
風疏遠磬秋開講
水響寒車夜救田
藍綬有香花菡萏
竹窗無寐月嬋娟
自慚政術貽枯旱
忍卧松陰漱石泉

言懷

宦途日日與心違
人事紛紛任是非
却爲遊山置行李
漁家船舫道家衣

泛吳松江

葦蓬疎薄漏斜陽
半日孤吟未過江
唯有鷺鷥知我意
時翹足對船窓

蘇州寒食日送人歸觀

江城寒食下花木
慘離魂幾宿投山寺
孤帆過海門
篷聲潑火雨
柳色禁烟村
定省高堂後
斑衣減淚痕

春晚遊太和宮

數里新萍夾岸莎春來乘興宿煙蘿隨風蝴蝶顛狂甚當
路花枝採折多絳節參差抽苦笋翠鈿狼藉撒圓荷湖山
滿眼不歸去空羨漁翁雨一蓑

再泛吳江

二年爲吏住江濱重到江頭照病身滿眼碧波輪野鳥一
蓑疎雨屬漁人隨船曉月孤輪白入座晴山數點青張翰
精靈還笑我綠袍依舊惹埃塵

贈湖州張從事

前年春榜亞龍頭詞賦曾推第一流上直未歸紅藥院供
吟先得白蘋洲酒醒野寺烹山蕨公退溪亭狎海鷗自是
吳門折腰吏滿衣塵土爲君羞

送李中舍罷蕭山赴闕

吏隱江東五六年歸時猶戀好山川野僧送別攜詩句瘦
馬臨岐當酒錢吳苑醉逢梅弄雪隋隄吟見柳垂烟自言
更共秋濤約未捨西典一釣船

和郡寮題李中舍公署

樹影池光映曉霞綠楊陰下吏排衙閑拖屐齒妨橫筍靜
拂琴床有落花地脉暗分吳苑水厨烟時煮洞庭茶青宮
詞客多閑暇按曲飛觴待歲華

題張處士溪居

雲裏寒溪竹裏橋野人居處絕塵囂病來芳草生漁艇
睡起殘花落酒瓢閑把道書尋晚迳靜攜茶鼎洗春潮長洲
懶吏頻過此爲愛盤飧有藥苗

送查校書從事彭門

佐幕徐方鬢未秋，官升芝閣更風流。
姓名舊在鸞遷榜，詩什重題燕子樓。
漸有俸錢供藥債，應無歸夢到漁舟。
公餘時上臺頭寺，珠履金貂共勝遊。

送羅著作奉使湖湘

使星躔次入長沙，曉別延英去路賒。
數刻漏中承密旨，幾重湖外奉皇華。
山行馬拂湘川石，寺宿僧供嶽麓茶。
迴日期君直西掖，當階紅藥正開花。

送馮學士入蜀

錦川宣其少年期，四十風情去未遲。
蠶市夜歌欹枕處，峨眉春雪倚樓時。
休誇上直吟紅藥，多羨乘軺聽子規。
莫學當初杜工部，因循不賦海棠詩。

賀將作孔監致仕

泣辭明主挂冠簪，便約幽雲老舊林。
朝請罷來頻典笏，田園歸去只攜琴。
焚香靜院當山色，晒藥空庭避竹陰。
一子得官三品祿，未饒疎傳有黃金。

和陳州田舍人留別

演綸多暇每封章，暫去頒條道更光。
郡吏好排紅粉妓，使君曾是紫薇郎。
樓臺有月新詩出，園圃無人綠草長。
地接清淮足佳致，水村煙塢是魚鄉。

閣下暮春

詔書稀少日，何長閑枕通中睡。
一場院吏報來丞，相出紫薇花影上東廊。

初入山聞提壺鳥

時秋暖此鳥忽聞

遷客由來長合醉不煩幽鳥道提壺商州未是無人境一
路山村有酒沽

初到商州館于妙高禪院佛屋壁上見草聖數行讀
之乃數年前應制時所作皇帝試貢士詩思追前
事有感而成章

應制詩篇對玉除是誰傳寫到商子晉從藁茨階前作今
向蓮花座畔書商顏未甘隨綺季漢庭曾忝用相如山僧
莫怪頻垂淚乍別承明舊直廬

謫居感事 一百六十韻

遷謫獨熙熙襟懷自坦夷孤寒明主信清直上天知消息
還依道生涯只在詩唯當諭山水詎敢詠江蘼偶嘆勞生
事因息志學時讀書方觀奧下筆便搜奇賦格輕鸚鵡儒

冠薄鷄鷄耕桑都不事園井未曾窺必欲縑湘富寧教尋
軸紕光陰常矻矻交友盡惓惓步驟依班馬根源法孔姬
收螢秋不倦刻鵠夜忘疲流輩多相許時賢亦見推叨蒙
偕計吏濫吹謁春司僕瘦途中病驢寒雪裏騎空拳入塲
屋拭目看京師技癢初調箭鋒銛欲試錐甲科登漢制平大
興國五年予內殿識堯眉數刻愁晡矣三題亦勉之先鳴
首中甲科輸俊彥上第遂參差罷舉身何托還家命自奇惟慚親倚
戶敢望嫂停炊竭力求甘旨終朝走路岐貪希仲由米多
廢董生惟丹桂何時折孤蓬逐吹移知憐無國士志氣自
男兒季子貂裘弊狂生刺字墮廣場重考覆蹇步載馳驅
明代寧甘退青雲暗有期禮闈冠多士御試拜丹墀澤霧
寧慚豹搏風肯伏雌重瞳念孤迹一第泰鴻私得告還鄉

貴除官佐邑卑折腰稱小吏矩步慎初資予解褐枳棘心

何恨松筠操自持及親家有養事長禮無虧銅墨官常改

煙霄雨露垂縣花聊主管寺棘且羈縻事知蘇州長洲縣

吳郡包山側長洲巨海湄萬家呼父母民間多呼縣令為父母官百里

撫博婺敢起徒勞嘆長憂竊祿嗤宦途甘碌碌官業亦孜

孜政事還多暇優游甚不羈村尋魯望宅寺認館娃基甫

有陸魯望宅靈西子留香逕吳王有劔池採香徑在靈岩寺劔池在虎丘

寺狂歌殊不厭酒興最相宜草織登山履蒲紉平挽舫綏

果酸嘗橄欖花好插薔薇震澤柑包火松江繪縷絲三年

無異政一篋有新詞多戀南園卧蘇州南園最為勝景俄從北關追

雍熙四年予奉徵召赴關呈材真樸橄召對立茅茨載筆居三館登朝

忝拾遺紫泥天上降朱紱御前披侍從殊為貴圖書頗自

怡史才媿班固諫筆謝辛毗擬把微軀殺慚將厚祿尸安

邊上章疏端拱三年詔百官各言邊事端拱獻箴規拜拾

遺即上端拱箴頗有諷諭精鑒逢英主知憐是首夔趙許公所器為賡

歌才不稱掌誥筆難摛是歲蒙上召予殿上拜制曆多無事

閣下有制曆當直舍人詞頭每怯遲繁陰温室樹清吹萬

年枝青瓊霞光透蒼苔露片萎御香飄硯席宮葉落纓綉

看浴池心鳳閑捫殿角螭上林花掩映仙掌露淋漓對近

瞻旒冕班清辟虎貔宮簾垂翡翠御水動漣漪紀號年淳

化朝元月建寅叶攝官捧寶冊淳化元年立正伏別上尊

實祝壽執樽彝表案行低折時予又押宮懸聽肅祗德音

王澤潤是月德謙柄斗杓移時上省貴接皋夔步深窺龍

鳳姿策勳何煊赫賜紫更萎蕤是歲加柱國謝蚊力山難

負鵝梁翼易滋論功慚八柱受服欲三禡音祗慮殃將至

曾無事可禪趨朝空俯偃退食自逶迤更直當春好橫行

隔宿咨每休假三日後謂之橫行內朝長得對駕幸每教

隨瓊院觀雲稼金明閣水嬉賞花臨鳳沼侍釣立魚坻拂

面黃金柳醜顏白玉卮分題宣險韻每應制賦詩翻勢得

仙碁上嘗賜兩制碁勢圖一曰對面千里二曰獨飛天竟

舉窺天管爭燃煮豆其恨無才應副空有表虔祈每有御

難并新碁勢但上表睿睠偏稱賞天顏極撫綏中官賜大

字兩朝每賜御詩皆院吏捧巾綦遭遇誠堪惜功名竊自

思請纓無壯志硯草亦胡為未獻東封頌空鑄北獄碑存

元年奉勅重修深慚專俎豆長欲議邊郵但可懷于何

須斬谷蠡胷中貯兵甲堂上有熊羆成敗觀千古流張在

四維兼磨斷仗劔擬樹直言旗巴上蓋言予遇事難絀

平居疾嗻咿無權逐鳥雀俛首任狐狸廷尉專刑煞以制

人兼大詞臣益等衰五花儀久廢三尺法聊施書命猶無

諛予在閣下草詞多不虛評刑宥有欺厚誣凌近侍內亂

疾妖尼妖尼道安誣告徐騎省丹筆當無赦金科了不疑拜章期悟

主仆法更防維萋非終無已雷霆遂赫斯如茲傷訐直投

杼覓瑕疵衆鑠金須化羣排柱不支佞權廻北斗讒舌簸

南箕闕下羊腸險朝端虎尾危道孤貽衆怒責薄賴宸慈

西掖除三字南山佐一麾蒼黃塵滿面揮洒涕交頤目斷

九重闕魂銷八達衢尊親遠扶侍兄弟盡流離秦嶺偏巉

絕商于更嶮熾吾廬何處是我馬忽長辭六里山蒼翠丹

河浪渺瀰分封息衛鞅割地憶張儀懶讀三閭傳空尋四

皓祠畚煙濃似瘴松雪白如梨壞舍床鋪月寒窓硯結澌
振書衫作拂解帶竹爲梳呼童泥茶竈從僧借藥篩鐘愁
上寺起角怨水門吹上寺在州北城有水門舊友誰青眼新秋出白
髭子到商州始有白髭煙嵐晴鬱鬱風雨夜颼颼我過徒三省吾生
自百罹初來聞旅雁不覺見黃鸝市井攜山菜房廊蓋木
皮商州民多以木皮苦屋野花紅爛熳山草碧樵樵副使官資冷商
州酒味醜尾因求食掉角爲觸藩羸有夢思紅藥無心採
紫芝瘦妻容慘戚稚子淚漣漉暖怯蛇穿壁昏憂虎入籬
松根燃夜燭山蕨助朝飢豈獨堂虧養還憂地乏醫跡飄
萍渤海親老日崦嵫閣下辭巢鳳山中伴野麋風欺秀林
木雲隔向陽葵屈產遭駑馬丹山困嚇鴟悔須分黑白本
合混妍媸自此韜餘刃終當學鈍鎚窮通皆有數得喪又

龍鳳茶

奚悲自顧才何者空憐道在茲宣尼猶削伐大禹亦胼胝
運去當如鼠投來且禦魍避風聊戢翼得水會揚馨琴酒
圖三樂詩章效四虫白公有四虫詩魚須從典賣貂尾任傾欹兀
兀拖腸鼠悠悠曳尾龜北窓尋蛺蝶南岸看鷓鴣山翠樓
頻上雲生杖獨撐簞閑留曉魄簷暖負冬曦松栢寒仍翠
瓊瑤涅不滯望誰分曲直祇自仰神祇吾道寧窮矣斯文
未已而狂吟何所益孤憤洩黃陂

上寺留題

在商州北山作

樣標龍鳳號題新賜得還因作近臣烹處豈期商嶺水碾
時空想建溪春香于九畹芳蘭氣圓似三秋皓月輪愛惜
不嘗惟恐盡除將供養白頭親

松杉疎瘦簇山根樓殿參差對郭門不惜馬蹄來北寺爲
憐熊耳在西山一作雲生石砌搖寒影泉汲銅餅露凍痕
遷客頻來何所得一叢修竹拂吟魂

歲暮感懷貽馮同年中允二首

謫居商于郡閑門車馬稀塵侵書命筆香散入朝衣燒盡
峰巒出霜晴木葉飛夜來天欲雪寒夢不成歸
謫居京信斷歲暮更淒涼郡僻青山合官閑白日長燒烟
侵寺舍林雪照街坊爲有遷鶯侶詩情不敢忘

畬田調 并序

上洛郡南六百里屬邑有豐陽上津皆深山窮谷不通
轍迹其民力耕火種大底先斫山田雖懸崖絕嶺樹木
盡仆俟其乾且燥乃行火焉火尚熾卽以種播之然後

釀黍稷烹雞豚先約曰某家某日有事于畬田雖數百
里如期而集鉏斧隨焉至則行酒啗炙鼓譟而作蓋斲
而掩其土也斲畢則生不復耘矣援桴者有勉勵督課
之語若歌曲然且其俗更互力田人人自勉僕愛其有
義作畬田五首以侑其氣亦欲採詩官聞之傳于執政
者苟擇良二千石暨賢百里使化天下之民如斯民之
義庶乎汗萊盡闢矣其詞則取乎俚蓋欲山民之易曉
也

大家齊力斲孱顏耳聽田歌手莫閑各願種成千百索田
不知畝畝但以百尺繩量之曰某豆箕禾穗滿青山
家今年種得若干索以爲田數殺盡雞豚喚斲畬由來逶互作生涯莫言火種無多利株
樹明年似亂麻種穀之明年自然生木山民獲濟

穀聲獵獵酒醺醺
斫上高山入亂雲
自種自收還自足
不知堯舜是吾君

北山種了種南山
相助力耕豈有偏
願得人間皆似我
也應四海少荒田

畚田鼓笛樂熙熙
空有歌聲未有詞
從此商于為故事
滿山皆唱舍人詩

賀畢翰林新入

閒步花磚喜復悲
所悲君較十年遲
銀臺曉入批丹詔
銅鏡秋開鑷白髭
宮錦細袍宜與着
內閑騎馬賜來騎
家門記得咸通事
莫忘論兵夜召時

咸通中畢相在翰林時懿宗將復河湟夜召論邊事數陳方略甚稱旨上曰吾方謀帥不意頗牧在吾禁苑遂有登壇之命

商山海棠

錦里名雖盛商山艷更煩
別疑天與態不類土生根淺著
紅蘭染深于絳雪噴待開先釀酒
怕落預呼魂香裏無効
敵花中是至尊桂須辭
刀窟桃合避仙源浮動冠頻側
霓裳袖忽翻望夫臨水石窺客
出墻垣贈別難饒柳忘憂
官讓萱輕輕飛燕舞脉脉息嬌言
蕙陋虛侵逕梨凡浪占園
論心留蝶宿低面厭鶯喧
不忝神仙品何辜造化恩
自期栽御苑誰使擲山村
綺季荒祠畔仙娥古洞門
煙愁息舊夢雨泣怨新婚
畫恐明妃恨移同卓氏奔
祇教三月見不得四時存
綉被堆籠勢燕脂浥淚痕
貳車春未去應得伴芳罇

翰林畢學士寄示醫癩疾藥方因題四韻兼簡兩制

諸知

預憂囊瘦病龍鍾乞得仙方必有功縱免項如樗里子也
應頭似夏黃公西暉亭下峰巒碧亭在州之西十里對羣峰每日落時有如亭午
南靜川中木葉紅川在州之南二里平如掌居人百餘家秋來一川紅葉又有小桃細竹夾水
而生春間此景不惡矣盡是貳車堪醉處春來唯恐酒樽空

賀柴舍人新入西掖

早拆蟾宮第一枝綸闈恩命若何遲久為俗吏殊無味合
掌王言亦有時好繼忠州文最盛應嫌長慶格猶卑舍人嘗與余詳前賢詔詰以為陸相首出若奉天罪已詔元白之徒可坐在廡下他年莫忘中吳宰六
里山前謁紫芝

歲除日同年馮中允攜觴見訪因而沉醉病酒三日醒而偶贈

除夜渾疑便白頭攜壺相勸醉方休敢辭枕上三朝卧且
免燈前一夕愁薄命我甘離屬關多才君亦滯龍樓相逢
不盡杯中物何以支當寂寞州

放言

誰信人間是與非進須行道退忘機卦逢大壯羝羊困鄉
入無何蛺蝶飛澤畔衣裳蘭作佩山中生計竹為扉飢腸
已共夷齊約一曲高歌去採薇

回襄陽周奉禮同年因題紙尾

武關西畔路巉岩兩月勞君寄兩緘鏡裏想添新白髮篋
中猶貯舊青衫扶頭酒好無辭醉縮項魚多且放噉譬似
元和張太祝十年不改舊官銜

清明日獨酌

一郡官閑惟副使一年冷節清明春來春去何時盡開

恨閑愁觸處生添燕黃鸝誇舌健柳花榆莢鬪身輕脫衣
換得商山酒笑把離騷獨自傾

寒食

今年寒食在商山山裏風光亦可憐稚子就花拈蛺蝶人
家依樹繫鞦韆郊原曉綠初經雨巷陌春陰乍禁烟副使
官閑莫惆悵酒錢猶有換碑錢

山僧雨中送牡丹

數枝香帶雨霏霏雨裏攜來叩竹扉擬戴却休成悵望御
園曾插滿頭歸

春居雜興

兩株桃杏映籬斜粧點商山副使家何事春風客不得和
鶯吹折數枝花

春雲如獸復如禽日照風吹淺又深誰道無心便客與亦
同翻覆小人心

登郡南樓望山感而作

西接藍田東武關有唐名郡數商顏二千石盡非吾道一
百年來負此山自唐末至今百餘年無文臣為刺史重疊曉嵐新雨後參差
春雪夕陽間唯供遷客風興典醉望吟看不暫閒

道服

楮符布褐皂紗巾曾奉西宮寓直人此際暫披因假日如
今長著見閑身濯纓未識一湘水漉酒空經六里春不為
行香著朝服二車誰信舊朝臣

春遊南靜川

南過高車嶺

一云膏車川

似掌平峰巒開畫障缺缺列

綦杯帝女柔柔綠王孫野草生提壺催我醉戴勝勸人耕
商嶺堪攜妓丹河好濯纓蓋圓松影密鞭亂竹根獐勃勃
畬田氣磷磷水磴聲野桃誰似主山鳥不知名欲舞寧無
蝶思謔亦有鶯官閑春日永擔酒此中行

南郊大禮詩七首

聖君重卜祀南郊仗擁黃麾間白旄仙吹冷翻蒼玉佩
曉霞晴透絳紗袍天開兜率齋宮靜海湧蓬萊帳殿高遷客
生還知有望商山不敢讀離騷
嚴配郊丘展孝思質明參酌禮無違大羹味薄牲牲潔至
樂聲和鳳鳥飛黃道月斜風細細紫壇天曉露霏霏可憐
此夜商山客畫盡爐灰淚滿衣
絲城殘月帶微霜版奏中嚴夜未央三獻欲終侵曙色百

神齊下散天香珠旒微亂塤箎韵柴燎輕籠劍佩光此夕
商山對何物猿啼鳥哭樹蒼蒼

嚴禋禮退一陽生抃賀歡呼動四溟聖壽久長南至日寶
圖高大北辰星九重城闕天將曙百萬人家家戶不扃知有
化工無棄物海波分細一浮萍

乾元門上赭袍光雉扇初開散御香郊祀一千年運祚赦
書三萬里封疆人間草木沾皇澤天上咸韶送壽觴惆悵
昔年曾侍從而今翻似鼠拖腸

千官雲擁御樓時朝服紛紛換禮衣萬里梯航歸大國一
聲雷雨破圓扉青蠅傳去人人喜丹鳳卸來處處飛收盡
洛南遷客淚全家潛望日邊歸

年來不見祀圓丘謫宦攜親嘆白頭作賦有時悲鵬鳥殺

身無路學犧牛非才豈合居臺閣歸夢徒勞近冕旒千載
遭逢如未替此時重見帝王州

恭聞种山人表謝急徵不赴

表讓皇家買酒錢上令京兆府賜山酒錢讓而不受醉鄉歸去更陶然吾
君若問徵君意自有東臯種黍田
不應明時鵠板書可能終老傲唐虞神仙見說須陰德宥
為蒼生一出無

五更睡

數載直承明寵深還若驚趁朝鷄喚起殘夢馬馱行左宦
離雙闕高眠盡五更如將閑比貴此味敵公卿

遣興

百年身世片時間况是多愁鬢早斑貧有琴書聊自樂貴
無功業未如閑波平南浦堪垂釣日滿東窗尚掩關祇為
慈親憶歸去商山不隱隱何山

新秋卽事二首

宦途流落似長沙賴有詩情遣歲華吟弄淺波臨釣渚醉
披殘照入僧家石挨苦竹旁抽笋雨打戎葵卧放花安得
君恩許歸去東陵閑種一園瓜
百歲浮生一夢中夢中何事有窮通姓名舊署黃麻紙顏
狀今成白髮翁煙暝小窓螢火碧雨昏幽徑蓼花紅謫居
始信為儒苦生計兼無一畝宮

秋居幽興三首

秋光雖寂淡幽興入詩家籬暗蟹啼菊園荒蟻上茄圍碁
知日影理髮見霜華向曉兒童喜溪僧遣晚瓜

園林經積雨晚步息幽哉宿鳥頭相並秋瓜頂自開藥田
荒野蔓屐齒沒蒼苔幽興將何遣篋琴賞酒來
謫居人事慵幽興與誰同僧到烹秋菌兒啼索草蟲掃苔
留嫩綠寫葉惜殘紅歲晏琴樽好籬邊有竹叢

前賦村居雜興詩二首間半歲不復省視因長男嘉
祐讀杜工部集見語意頗有相類者咨于予且意
予竊之也予喜而作詩聊以自賀

命屈由來道日新詩家權柄敵陶鈞任無功業調金鼎且
有篇章到古人本與樂天爲後進予自謫居時多取
自公詩時時玩之敢期
子美是前身從今莫厭閑官職主管風騷勝要津

村行

馬穿山徑竹初黃信馬悠悠野興長萬壑有聲含晚籟數

蜂無語立斜陽棠梨葉落胭脂色蕎麥花開白雪香何事
吟餘忽惆悵村橋原樹似吾鄉

淳化二年八月晦日夜夢于上前賦詩既寤唯省一
句云九日山川見菊花間一日有商于二車之命
實以十月三日到郡重陽已過殘菊尚多意夢已
徵矣今忽然一歲又過登高追續前詩因成四韻
節近登高忽嘆嗟經年憔悴別京華二車何處搔蓬鬢九
日山川見菊花夢裏榮衰安足道眼前杯酒且須賒商于
鄒魯雖迢遞大底攜家卽是家

仲咸就嘉郡印因以四韻爲賀且有以勉之
如何小郡滯清賢未得徵歸振鷺班莫怕三年持漢詔猶
勝遷客卧商山俱諳宦路須推命同有詩情令好閑唯是

謫官無考限比君知向幾時還

寄豐陽喻長官

七十年華鬢未霜道情偏稱宰豐陽旦衙請印無仇覽豐陽
戶不滿千夜榻圍棋祇孟光喻好棋與庭戶萬重嵐氣盛
例省主簿盤餐數飢藥苗香猶言彭澤終歸去門柳青青檻菊黃

喜雪貽仲咸

半冬無雪懶吟詩薄暮紛紛喜可知衣上惹來看不足竹
邊聽處立多時光迷曙色侵窓早片舞寒空到地遲今日
使君吟望好一車飛絮醉褰帷

齊後望山中春雪

誰種離離碎玉苗曉樓吟望興偏饒白雲作伴宜長在紅
日無情已半銷聚映早霞明野寺散隨春水過溪橋世間

安得王摩詰醉展霜縑把筆描

杏花七首

紅芳紫萼怯春寒蓓蕾粘枝密作團記得觀燈鳳樓上百
條銀燭淚闌干

暖映垂楊曲檻邊一堆紅雪罩春煙春來自得風流伴榆
莢休拋買笑錢

桃紅梨白莫爭春素態妖姿兩未勻日暮墻頭試回首不
施朱粉是東鄰

長愁風雨暗離披醉遠吟看得幾時只有流鶯偏稱意夜
來偷宿最繁枝

登龍曾入少年場錫宴瓊林醉御觴爭戴滿頭紅爛熳至
今猶雜桂枝香

長安廢棄遷都後，曲沼荒涼一夢中。見說舊園爲茂草，寂寥無復萬枝紅。
陌上紛披枝上稀，多情猶解撲人衣。雙成灑道迎王母，十里濛濛絳雪飛。

日長簡仲咸

日長何計到黃昏，郡僻官閑晝掩門。子美集開詩世界，伯陽書見道根源。風騷北院花千片，月上東樓酒一樽。不是同年來主郡，此心安落共誰論。

自嘲

三月降霜花木死，九秋飛雪麥禾災。蟲蝗水旱霖霖雨盡，逐商山副使來。

偶圃小園因題二首

千眼春畦兩眼泉，置來因得弄潺湲。三年謫宦供厨菜，數月朝行貫宅錢。空媿先師輕學圃，未如平子便歸田。此心久畜耕山計，不敢拋官爲左遷。

偶營菜圃爲盤飧，淮瀆祠前水北村。泉響靜連衙鼓響，柴門深近子城門。濛濛細雨春蔬甲，疊疊寒流老樹根。從此庶于地圖上，畫工添个舍人園。

三月二十七日偶作簡仲咸

一未量移一轉勳，時數後予未量移貂冠羊胃揔非真。予檢校常侍故云貂冠仲咸祗加騎都尉青杏勸君重酌酒，牡丹邀我且尋春。請看富貴趙中令，已作北邙山下塵。

別丹水

曾經爛漫濯吾纓，忍別潺湲月夜聲。便入紅塵染詩思，吟魂猶合數年清。

寄潘處士

賣藥先生白布衣，書來方信在京師。滅君爐裏燒丹術，助我山中買酒貲。處士自京寄白金相贈閑似野雲終不住，閉如籠鶴已多時。飄飄又去黃河北，更負中條幾首詩。

自寬

身世龍鍾且自寬，追量才分合飢寒。朝中舊友休誇貴，篋裏新詩不博官。曉髮靜梳微叢落，夜琴閑拂古風殘。會須歸去滄江上，累石移莎擁釣灘。

贈衛尉宋卿二十二丈

謫宦歸來髮更斑，徊翔猶在寺卿閑。幾多僚友三台上，大

半生徒兩制，間舊賜錦袍。多貫酒新裁，紗帽欲歸山東垣。小諫龍鍾甚空媿，洪爐早鑄顏。

送融州任吳戶曹撰越王愛姬墓誌得罪

御前曾取好科名，一椽如何萬里行。身落蠻方人共惜，罪因文學自為榮。吏供版籍多魚稅，民種山田見象耕。君看咸通十司戶，投荒終久是公卿。

寧公新拜首座因贈

著書新奏御，上詔承旨蘇公道士韓德純與公集三優詔及禪扉首座名。雖貴家山老未歸，磬聲寒遶枕。塔影靜侵衣，終憶西湖上秋風白鳥飛。

幕次閑吟三首

二年憔悴詠江籬，恩詔重教侍玉墀。寓直掖垣休入夢，常

參幕次且吟詩新文自負山中集舊吏多驚鬢畔絲莫道
諫官無一事猶勝閑卧解州時

文章曾受帝褒稱幕次孤吟冷似冰借馬趨朝長後到問
人求米盡難憑僅教罷樂朝無酒兒廢看書夜絕燈除却
金章在腰下其餘滋味一如僧

江籬吟盡鬢成霜謫宦歸來夢一場每日祇窺丹鳳案被
人猶喚紫薇郎齋宮獨坐風翻幕客舍閑吟葉滿床若是
承明客再入未曾荒廢舊文章

寄題義門胡氏華林書院

水閣山齋架碧虛亭亭華表映門閭力田歲取千箱稻好
事家藏萬卷書旋對杯盤燒野筍別開池沼養溪魚吾生
未有林泉計空媿妨賢卧直廬

送張監察通判餘杭

郡城瀟灑浙江濱暫輟乘驄慰遠民莫放霜威誇御史且
收風景屬詩人雪侵樓上迎潮眼花擁湖中泛月身盡是
公餘吟咏處好飛佳句寄詞臣

書齋

年年賃宅住閑坊也作幽齋作道裝守靜便為生白室著
書兼是草玄堂屏山獨卧千峰雪御札時開一炷香莫笑
未歸田里去宦途機巧盡能忘

送柴諫議之任河中

蒲津名郡得名公諫紙盈箱且罷封紅藥堦墀曾吐鳳綠
莎廳事舊鳴蜚故事河府院有綠莎廳唐來治平時好事者嘗加澆醜兵與之後為不好事劇去之
公好事者也可覆此景故云下車首謁重華廟入境先經五老峰見說

丘門詩版在應教回也繼遺蹤故兵部王侍郎常知河府公之陸圭也

送李著作

芸閣新銜捧詔歸歷陽湖畔拜庭闈已聞愛子披朱綬郎君已賜服色猶學嬰兒著絲衣飯饋海陵紅稻軟鱸擎淮水白魚肥吾生自失榮親祿謾踏花磚入北扉

滁州官舍

忽從天上謫人間知向山州住幾年俸外不教收果實公餘多愛入林泉朝簪未解雖妨道宦路無機卽是禪鈴閣悄然私自問郡齋何異玉堂前

今冬

休思官職落青雲且算今冬病養身白紙糊窓堪聽雪紅爐着火別藏春旋芻官醞漂浮蟻時取溪魚削白鱗况是

豐年公事少為郎為郡似閑人

高閑

謫官滁上欲何為惟把高閑度歲時費盡俸錢因合藥忙于公事是吟詩京中吏去慵傳信江外僧來與撰碑更待吾家婚嫁了解龜休致未全遲

臘月

臘月滁州始覺寒年豐歲暮郡齋閑官供好酒何憂雪天與新詩合看山日照野塘梅欲綻燒迴荒徑草猶斑吏人散後無公事門戟森森夕鳥還

有傷

壁上時牌催晝夜案頭朝報見存亡懸車又喪司空相延閣新薨賈侍郎二公相繼薨陶鑄官資經化筆某登朝後所任官皆司空在中

書品題名姓在文場子應舉時賈公以駕部員外知總惟制誥同知貢舉遂蒙首冠多士一慟無由得徒灑春風淚數行

寄杭州昭慶寺華嚴社主省常上人

夢幻吾身是偶然勞生四十又三年任誇西掖吟紅藥何似東林種白蓮入定雪龕燈焰直講經霜殿磬聲圓謫官不得餘杭郡空寄僧高結社篇

詩酒

白頭郎吏合歸耕猶戀君恩典郡城已覺功名垂素志祇憑詩酒送浮生剛腸減後微微颯病眼昏來細細傾樽杓不空編集滿未能將此換公卿

贈朱嚴

未得科名鬢已衰年年憔悴在京師妻裝秋卷停燈坐兒

趁朝冷乞米炊尚對交朋賒酒飲徧看卿相借驢騎誰嚴妻能書所好還同我韓柳文章李杜詩

戲和壽州曾秘丞黃黃詩

黃黃真是小巫娥買恐千金價不多別母語嬌空有淚對人聲顫未成歌產從南國勝桃李攜去東山隱薜蘿滌上老郎無妓女草玄讀易擬如何

和朱嚴留別依本韻

之子有文行常流竊比難揮毫秋露下生文學餘力尤工篆隸開卷古風寒塲屋推盟主聲詩立將壇論儒輕五伯議古嫉三桓師仰惟韓愈才名壓李觀生有師韓說固窮多短褐憂道卽忘食見訪山園郡相逢菊滿欄眼青憐造士頭白愧郎官罷舉層霄遠監州勺水蟠貧厨兼味少市醞數杯酸舊業

頌君勸新題為我刊生為子刊小畜集又書入絕詩石臨岐留雅什天馬

感金鑾

歲暮感懷

歲暮山城放逐臣老從霄漢委泥塵公卿別後全無信兄弟書來祇說貧眼看青山休未得鬢垂華髮摘空頻文章氣槩成何事霑惹虛名誤此身

茶園十二韻

勤玉修歲貢晚駕過郊原蔽芾餘千本青葱共一園牙新撐老葉新牙之上去年舊葉尚在土軟迸新根舌小伴黃雀毛獐摘綠猿出蒸香更別入焙火微溫採近桐華節生無穀雨痕緘騰防遠道進獻趨頭番待破華胥夢先經閭闔門汲泉鳴玉甃開宴壓瑤樽茂育知天意甄收荷主恩沃心同直諫

苦口類嘉言未復金鑾召年年奉至尊

寒食

寒食江都郡青旗賣楚醪樓臺藏綠柳籬落露紅桃妓女穿輕屐笙歌泛小舸使君慵不出愁坐讀離騷

牡丹十六韻

艷絕百花慙花中合面南賦詩情莫倦中酒病先甘國色渾無對天香亦不堪遮須施錦帳戴好上瑤簪苞拆深擎露枝拖翠出藍半傾留粉蝶微亞摘宜男鄰妓臨粧妬胡蜂得葢貪忽行晴吹動濃睡曉烟含話別年經一相逢月又三遣誰擗白髮為爾換新衫池館邀賓看衙庭放吏參仙娥喧道院魔女逼禪庵道院禪庵皆公署內所有亂折窠難惜分題韻更探歌歡殊未厭零落痛曾諳穀雨供湯沐黃鸝助笑

談顏生如見此未免也醺酣顏回不飲酒

芍藥開花憶牡丹

風雨無情落牡丹翻階紅藥滿朱欄明皇幸蜀楊妃死縱有嬪嬙不喜看

海仙花詩并序

海仙花者世謂之錦帶維揚人傳云初得于海州山谷間其枝長而花密若錦帶然其花未開如海棠既開如木瓜而繁麗孌弱過之一朶滿頭冠不克荷惜其不香而無子第可鈎壓其條移植他所因以釋草釋木驗之皆無有也近之好事者作花譜以海棠為花中神仙予謂此花不在海棠下宜以仙為號目之錦帶俚俗甚焉又取始得之地名曰海仙且賦詩二章以存其名題諸

僧壁

一堆絳雪壓春叢孌孌長條弄晚風借問開時何所似將綉被覆薰籠

春憎窈窕教無子天為妖嬈不與香盡日含毫難並此花中應是衛莊姜

何年移植在僧家一簇柔條綴綵霞錦帶為名俚且俗為君呼作海仙花

后土廟瓊花詩二首并序

揚州后土廟有花一株潔白可愛且其樹大而花繁不知實何木也俗謂之瓊花云因賦詩以狀其態

誰移琪樹下仙鄉二月輕冰八月霜若使壽陽公主在自當羞見落梅粧

春水薄薄壓枝柯分與清香是月娥忽似暑天深澗底老
松擎雪白娑婆

芍藥詩 并序

芍藥之義見毛鄭詩百花之中其名最古謝公直入中
書省詩云紅藥當堦翻自後詞臣引爲故事白少傅爲
主客郎中知制誥有草詞畢詠芍藥詩詞彩甚爲該備
然自天后以來牡丹始盛而芍藥之艷衰矣考其實牡
丹初號木芍藥蓋本同而未異也予以端拱己丑歲由
左司諫爲制誥舍人後坐事黜棄淳化甲午年又以禮
部員外郎牽復舊職尋以本官充翰林學士則謝公白
傅之任皆蹂躪矣自出除上移廣陵追念綸闈于今九
載而編集之內未嘗有芍藥詩言于詞臣不得無過揚

州僧舍植數千本牡丹落時繁艷可愛因賦詩三章書

于僧壁

牡丹落盡正淒涼紅藥開時醉一場羽客諳傳尸解術仙
家重蕪返魂香蜂窠檀口論前事露濕紅英試曉粧曾黍
掖垣真舊物多情應認紫薇郎

東君留着占殘春得得遲開亦有因曾與掖垣留故事又
來淮海伴詞臣日燒紅艷排千朶風遞清香滿四鄰更愛
綠頭弄金縷異時相對掌絲綸

滿院勻開似赤城帝鄉齊點上元燈感傷綸閣多情客珍
重維揚好事僧酌處酒杯深蘸甲拆來朶朶細含稜老郎
爲郡辜朝寄除却吟詩百不能

暮春

索寞紅芳又一年老郎空解惜春殘纔聞鶯囀誇楊柳已
被蟬聲哭牡丹壯志休磨三尺劍白頭誰藉兩梁冠酒樽
何必勞人勸且折餘花更盡歡

贈呂通秘丞

楚州監倉

聞君公事苦喧卑紅粟堆邊獨斂眉已入朝行翻掌度未
如畿尉且吟詩君前任畿尉堰頭笑傲同張祐市裏優游比路
隨惟有才名藏不得山陽留滯官多時

贈省欽師

師善八分書太宗召于殿上書數行得賜

紫木

舊隱何年別翠微瀑泉聲外鎖禪扉御前曾寫八分字天
上曾宣三事衣燈照夜寒霜後冷鼎烹秋菌雨中肥終歸
五老峰邊去杯渡長江一錫飛

送宋解處士之長安

簪芴盈門獨紹蘭卧龍潛在八龍間鴿原任說朝賢貴鶴
驚惟稱處士閑靜按仙經燒大藥狂挨僧壁畫遙山老郎
見說林歸計分取圭峰並掩關

贈狀元先輩孫謹

病中何事忽開顏記得詩稱小狀元子淳化辛卯歲贈君詩云明年再就堯階
試應破人呼小狀元粉壁乍懸龍虎榜錦標終屬鶻鴿原青雲隨步
登花塔紅雪飄衣醉御園還有一條遺恨處不教英俊在

吾門

贈凌儀朱學士

潘岳花陰覆杏壇門生叅謁絳紗寬西垣久望神仙侶北
部休誇父母官雨屐送僧莎遙滑夜棋留客竹齋寒何時

八音集金 四十三
倬直來相繼三入承明興漸闕

青猿

小僕如猿狖貧家備指呼未堪隨馬足已慣典魚須時洗
塵侵硯開收雨滴圖歸田如有計留負酒胡蘆

頃年謫官解梁收得令狐補闕毛詩音義其本乃會

昌三年所寫數行殘闕後人添之其筆跡乃工部

畢侍郎所補也昨因問之乃云亡失多年矣作四

韻以還之

謫宦山州自訓童因求書籍有遭逢偶收毛鄭古詩義認

得歐虞舊筆蹤南郡攜行心不足此本自解梁徵廻便合

幕府不敢私調遂西齋送去手親封塵侵煙染尤堪重年

攜去滌揚二州號標題歷武宗

伏日偶作

移牀施簟就南軒門掩閑坊半樹蟬多病形容只有骨食

貧生計旋無錢掖垣已黍年深直朝謁終妨日晏眠會解

綸闈求郡印早收餘俸卜歸田

贈密直張諫議

先皇憂蜀輟樞臣獨冒兵戈出劔門萬里辭家堪下淚四

年歸闕似還魂弟兄次序元投分兒女親情又結婚且喜

相逢開口笑甘陳功業不須論

送第三人朱嚴先輩從事和州

賃船東下歷陽湖榜眼科名釋褐初賓職不憂無厚俸郡

齋惟喜有藏書伴吟先買秋江雀醒酒時烹晚市魚廉使

多情應問我爲言衰病似相如

對雪示嘉祐

去年看雪在商州使君命我山寺頭峰巒草樹六百里飢
 颺凍鳥聲啾啾山城窮陋無妓樂何以銷得騷人愁抱餅
 自瀉不待勸乘興一引連十甌晚歸上馬頗自適狂吟醉
 舞夜不休今年看雪在帝里瑤臺瓊樹佳氣浮朝回攬轡
 聊四望移下五城十二樓樽中有酒翻不飲鬱鬱不快非
 怨尤吾兒嬌駿未曉事問我胡不私獻酬因令把筆寫我
 意為渠吟作雪中謳昔為副使不理事待罪且免憂人憂
 今為諫官非冗長拾遺三館俸入優秋來連澍百日雨禾
 黍飄溺多不收如今行潦占南畝農夫失望無來甍爾看
 門外飢餓者往往殍殍填渠溝峩冠旅進又旅退曾無一
 事裨皇猷俸錢一月數家賦朝衣一襲幾人裘安邊不學

趙充國富民不作田千秋胡為碌碌事文筆謂時頌聖如
 俳優一家衣食仰在我縱得飽暖如狗偷况我眼昏頭漸
 白安能隱几勤校仇何時提汝婦田去賣馬可易數隻牛
 深耕淺種苟自給藜藿豆粥充飢喉黍畦鋤理學元亮瓜
 田澆灌師秦侯素殮免作疲人蠹開卷免對古人羞未行
 此志吾戚戚對酒不飲抑有由斯言不敢向人道語爾小
 子為貽謀

送晁監丞赴婺州關市之役

關征市賦縻賢俊誰愛此官為吏隱將作晁丞于役時婺
 女星臨海邊郡黃絹辭高位尚卑白華行潔身猶困會待
 時來即併伸也知道在終無悶君不見路隨含笑坐市中
 屈身豈愧丹陽尹又不見張生狂醉戀揚州冬瓜堰下甘

肥遯此行况是奉皇華數丈輕舸載一家攜餅下岸買竹
葉挂席背風穿蓼花霜晴震澤初嘗橘泉過惠山應試茶
虎丘曉露靈隱雪錢塘夜潮照湖月密排詩景在途中旋
吟新句教兒童漸近金華見集
驥足暫拘絆八詠樓開頻啓宴醉中官妓乞詩詩剡溪紙
貴抄新詞他年誰獻子虛賦召入金門五雲路因思元白
在江東不似晁丞今獨步

還揚州許書記家集

許淮孫進家集得官

君不見近代詩家流胡爲蹇滯多窮愁孟郊憔悴死逆旅
浪仙斥逐長江頭張生飄泊冬瓜堰徒云輕薄萬戶侯浩
然無成鹿門去李洞慟哭昭陵休生無風教興玉他死無
勳爵貽孫謀可憐道日已替風騷委地何人收高陽許

公精定義獨向聖朝生後嗣因將先與進九重高步金臺

曳珠履祖德光輝聖主知府尹賢明丞相子

時維揚權牧
即故中令薛

相廣陵郡大古九州記室官清外三事遂令天下學詩人
徒羨君家窮四始我來迎侍遊江都玳筵往往陪歡娛遂
求家集恣吟諷海波乾處堆珊瑚因思賈孟數家一何苦
詩鬼嗷嗷餒無主子孫淪沒誰及君閑倚紅蓮傾綠醕草
檄餘閑好賦詩莫放風情忝爾祖

酬處才上人

我聞三代淳且質誰人熙熙誰信佛茹蔬剃髮在西戎梵
法不敢干華風周家子孫胡不肖奢淫僭亂際王道秦皇
漢帝又雜伯亦以威刑取天下蒼生哀苦不自知從此中
國羨西陲無端更作金人夢萬里迎來萬民重爲君爲相

猶皈依唯唯，誰敢非若教。却似周公時，生民豈宜顧。
披緇可憐嗷嗷，避征役半入金田。不耕織君子之道，動卽
窮亦有賢達藏其中。上人來自九華山，叩門遺我瓊瑤編。
錚錚五軸餘百篇，定交仍以書爲先。書中不說經文中，不
言佛有心直欲興文物。感師自遠來相親，爲師畫卦成同
人。出門無咎非羣分，袈裟墨綬何足云。

和馮中允爐邊偶作

誰爲東君掌青律，故將春日連人日。春日雨絲暖融融，人
日雪花寒慄慄。雨雪寒暖苦不同，可比交情去就中。仲咸
擁爐發歌詠，古風激破澆漓風。人情離合古來有，召公初
亦疑周公汾陽臨淮本仇隙。一旦分兵若親戚，四公翻覆
人不訛。各各操心爲邦國，此外譎張多爲已。反掌背面如

千里張耳陳餘，不忍言魏其。武安何足齒，我愛中允君子
心心與人交淡如水。別有人間勢利徒，一去一就隨榮枯。
西漢董賢方佞倖，孔光迎拜卑如奴。是時楊雄在東觀，投
閣欲死無人扶。有唐力士夫人死，朝士執喪平如喪妣。是
時李白放江邊，憔悴無人供酒錢。小人之性何所似，真如
蜂蝶并螻蟻。尋香逐臭苟朝昏，豈願松篁與蘭茝。重君誓
心一何極，澗底松兮陵上栢。澗松陵栢有朽時，我約君心
無改易。

烏啄瘡驢詩

商山老烏何慘酷，喙長于釘利于鏃。拾蟲啄卵從爾爲，安
得殘我負瘡畜。我從去歲謫商于，行李惟存一蹇驢。來登
秦嶺又巉岩，爲我馱背百卷書。穿皮露脊痕連腹，半年治

療將平復老鳥昨日忽下來啄破舊瘡取新肉驢號僕叫
鳥已飛翮背振毛坐吾屋我驢我僕奈爾何悔不挾彈更
張羅賴是商山多鷲鳥便問鄰家借秋鷄鉄爾拳兮鈎爾
爪折鳥頸兮食鳥腦豈惟取爾飢腸飽亦與瘡驢復仇了

拍板謠

麻姑親採扶桑木鏤脆排焦其數六雙成捧立王母前曾
按瑤池白雲曲幾時流落來人間梨園部中齊管絃管絃
纔動我能應知音審樂功何全吳宮女兒手如筍執向玳
筵爲樂準數聲慢仙人屐齒下雲棧老狐臘月渡黃河綏
步輕輕踏冰片數聲急空江電打漁翁笠鮫人泣對水精
盤滿把珠璣連瀉入劃然一聲送曲徹山基射透七重札
金鼎冷落閒無聞隴頭凍把泉聲絕律呂與我數自齊絲

竹望我爲宗師總驅節奏在術內歌舞之人無我欺所以
唐相牛僧孺爲文命之爲樂句

筵上狂詩送侍棊衣襖天使

昔事先皇叨近侍北門西掖華清地太宗多材復多藝萬
機餘暇翻棊勢對面千里爲第一獨飛天蛾爲第二第三
海底取明珠三陣堂堂皆御製中侍宣來示近臣天機秘
密通鬼神乃知棊法同軍法旣戒貪心又嫌怯惟宜靜勝
守封疆不樂窮兵用戈甲先皇三勢有深旨豈獨一枰而
已矣當時受賜感君恩藏于篋笥傳子孫至道年中出滁
上失脚青雲空悵望移典維揚目望還軒轅鼎成飛上天
龍髯忽斷攀不得舊朝衣上淚潺湲吾皇曲念先朝物微
歸再掌西垣筆悲涼忽見紅藥開哭臨空隨梓宮出去年

領郡得齊安山州僻陋在江干黃民誰識舊學士白頭猶
在老郎官昨日江邊天使到隨例霑恩着衣襖皇華本是
江南客曾侍先皇對棊奕筵中偶說當年事三勢分明皆
記得我從失職別上臺御書深鎖不將來遙想棊圖在私
室天香散盡空塵埃今日因君聊話及翻作停杯向隅泣
人生不易逢聖朝君恩未報雙鬢凋金鑿殿花春灼灼永
熙陵樹夜蕭蕭空嘆拖腸在泥土不如舐鼎升烟霄多病
相如猶未死追思往事欲魂消星使今辰迴馬首強對離
筵滿傾酒悲歌一曲從事書唱與朝中舊知友


還楊遂蜀中集

上玄茫昧胡爲乎施設吾道生吾徒否多泰少是天意生
有述作死不虛聖人憂患方演易賢者窮愁始著書盡令
富貴陷逸樂蠢蠢戢戢如雞猪泯朕無物作時瑞誰識鳳
皇與騶虞經史子集燦今古粉繪帝道張皇謨一言可採
卽不朽名姓張與日月俱乃知天心厚我輩窮辱不足形
悲呼夫君擢秀在江左國小而逼何區區科名始得值兵
火金陵坐見成丘墟歸朝纔得一贊善黜降重爲縣大夫
彰明僻遠在蜀道又遇祗賦攻成都徒行抱印入隴氏乞
食落何崎嶇歸來朝責作主簿朱衣暗淡鬢毛疎昨朝
投我蜀中作錚朕一集如瓊琚杜甫悲窳吟不輟庾信悲
哀情有餘我逢聖代自多難謾誇三人承明廬近令編綴
小畜集文筆詩賦何紛如才名官職不兩立真宰折刻分
毫銖郎官疎遠既未貴縣吏禮數不足拘相逢且說文章
樂爲君酌酒焚枯魚

騎省集鈔

徐鉉字鼎臣會稽人與弟鍇未弱冠以文行稱仕南唐
 三主歷官至吏部尚書右僕射機命制誥咸出其手文
 章議論與韓熙載齊名宋問罪江南請使見太祖乞存
 辨論不屈太祖亦嘉禮之後隨後主歸宋授太子率更
 令改左散騎常侍累封東海郡開國侯檢校工部尚書
 卒年七十六精於篆隸修許氏說文自撰韻譜江南馮
 延巳曰凡人為文皆事奇語不爾則不足觀惟徐公率
 意而成自造精極詩冶衍適麗具元和風律而無澳忍
 纖阿之習初嗣主以讒貶移饒州適周世宗兵過淮鉉
 即榜小舟歸昇州賦詩有云一夜黃星照官渡本初何
 面見田豐其伉直如此大梁以後氣稍衰矣蓋情

騎省集鈔



四十九

爲聲悽楚宛折則難言之意多焉

寒食宿陳公塘上

垂楊界官道茅屋倚高坡月下春塘水風中牧豎歌
閑立久對酒遠情多今夜孤亭夢悠揚奈爾何

登甘露寺北望

京口潮來曲岸平海門風起浪花生人行沙上見日
過江中間櫓聲芳草遠迷楊子渡宿煙濛映廣陵城游人
鄉思應如橘相望須含兩地情

京口江際弄水

退公求靜獨臨川楊子江南二月天百尺翠屏甘露閣數
帆晴日海門船波澄瀨石寒如玉草接汀蘋綠似煙安得
乘槎更東去

并游漫

重遊木蘭亭

繚繞長堤帶碧潯昔年遊此尚青衿蘭橈破浪城陰直玉
勒穿花苑樹深宦路塵埃成久別仙家風景有誰尋那知
年長多情後重凭闌干一獨吟

送魏舍人仲甫爲蘄州判官

從事蘄春興自長蘄人應識紫微郎山資足後拋名路蕪
菜秋來憶故鄉以道卷舒猶自適臨戎談笑固無妨如聞
郡閣吹橫笛時望青谿憶野王

宿蔣帝廟明日遊山南諸寺

便返城闌尚未甘更從山北到山南花枝似雪春雖半桂
魄如眉日始三松蓋遮門寒黯黯柳絲妨路翠毯登臨
莫怪偏留戀遊宦多年事事諧

愛敬寺有老僧嘗遊長安言秦雍間事歷歷可聽因
贈此詩兼示同行客

白首棲禪者嘗談灞滻遊能令過江客偏
桃花掩門臨杜若洲城中無此景將子剩淹留

和殷舍人蕭員外春雪

萬里春陰乍履端廣庭風起玉塵乾梅花
草堦前特地寒晴去便爲經歲別興來何
鴛侶皆閑暇贈答詩成禁漏殘

從兄龍武將軍歿于邊戍過舊營宅作

前年都尉沒邊城帳下何人領舊兵微外
前秋日照銘旌笙歌却返烏衣巷部曲皆
園林過寒食馬蹄猶擬入門行

景陽臺懷古

六言

後主亡家不悔江南異代長春今日景陽臺上閑人何用
傷神

寄駕部郎中

贈

賤子乖慵性頻爲省直牽交親每相見多在相門前君獨
疎名路爲郎過十年炎風久成別南望思悠然

秋日雨中與蕭贊善訪殷舍人於翰林座中作

野出西垣步步遲秋光如水雨如絲銅龍樓下逢閑客紅
藥堦前訪舊知亂點乍滋承露處碎聲因想滴蓬時銀臺
鎖入須歸去不惜餘歡盡酒卮

和明道人宿山寺

聞道經行處山前與水陽磬聲淡小院燈影迥高房落宿

依樓角歸雲擁殿廊羨師閑未得早起逐班行

晚歸

暑服道情出煙街薄暮還風清飄短袂馬健弄連環水靜
聞歸櫓霞明見遠山過從本無事從此涉旬間

除夜

寒燈耿耿漏遲遲送故迎新了不欺往事并隨殘曆日春
風寧識舊容儀預慙歲酒難先飲更對鄉儺羨小兒吟罷
明朝贈知己便須題作去年詩

正初答鍾郎中見寄

高齋遲景雪初晴風拂喬枝待早鶯南省郎官名籍籍東
隣妓女字英英流年倏忽成陳事春物依稀存舊情新歲
相思自過訪不煩虛左遠相迎

江舍人宅筵上有妓唱和州韓舍人歌辭因以寄

良宵絲竹偶成歡中有佳人俯翠鬟白雪飄颻傳樂府阮
郎憔悴在人間清風朗月長相憶佩蕙初蘭早晚還淡夜
酒空筵欲散向隅惆悵鬢堪斑

寒食日作

厨冷煙初禁門閉日更斜東風不好事吹落滿庭花過社
紛紛燕新晴淡淡霞京都盛遊觀誰訪子雲家

賀殷游二舍人入翰林江給事拜中丞

清晨待漏獨徘徊霄漢懸心不易裁閣老浚嚴歸翰苑夕
郎威望拜霜臺青綾對覆蓬壺晚赤棒前驅道路開猶有
西垣廳記在莫忘同草紫泥來

送歐陽太監遊廬山

家家門外廬山路唯有夫君乞假遊
案牘乍拋公署晚林泉已近洞天秋
海潮盡處逢陶石江月圓時上庾樓
此去蕭然好長往人間何事不悠悠

秋日廬龍村舍

置却人間事閒從野老遊
樹聲村店晚草色古城秋
獨鳥飛天外閑雲度龍頭
姓名君莫問山木與虛舟

和蕭郎中小雪日作

征西府裏日西斜獨試新爐自煮茶
籬菊盡來低覆水塞鴻飛去遠連霞
寂寥小雪閑中過斑駁輕霜鬢上加
算得流年無奈處莫將詩句祝蒼華

中書相公谿亭閑宴依韻

李建勳

雨霽秋光晚亭虛野興迴沙鷗掠岸去
溪水上階來客傲

風歎憤筵香菊在杯東山長許醉何事
憶天台

寄饒州王郎中效李白體

珍重王光嗣交情尚在不蕪城連宅住
楚塞並車游別後官三改年來歲六周
銀鈎無一字何以緩離愁

寄歙州呂判官

任公郡占好山川谿水縈迴路屈盤
南國自來推勝境故人此地作郎官
風光適意須留戀祿秩資貧且喜歡
莫憶班行重迴首是非多處是長安

宣威苗將軍貶官後重經故宅

蔣山南望近西坊亭館依然鑲院墻
天子未嘗過細柳將軍尋已戍燉煌
史萬歲嘗諫戍燉煌欵傾怪石山無色
零落圓荷水不香為將為儒皆寂寞
門前愁殺馬中郎

附池州薛郎中書因寄歙州張員外

新安從事舊臺郎直氣多才不可忘一旦江山馳別夢幾年簪紱共周行岐分出處何方是情共窮通此義長因附鄰州寄消息接輿今日信爲狂

寄江都路員外

吾兄失意在東都聞說襟懷任所如已縱垂慵爲傲吏有何關鍵制豪胥縣齋曉閉多移病南畝秋荒憶遂初知道故人相憶否嵇康不得嬾修書

送應之道人歸江西

曾騎竹馬傍洪崖二十餘年變物華客夢等閒過驛閣歸帆遙羨指龍沙名題小篆矜垂露詩作吳吟對綺霞歲暮定知迴未得信來憑爲寄梅花

臨石步港

碕岸隳縈帶微風起細漣綠陰三月後倒影亂峰前吹浪游鱗小黏苔碎石圓會將腰下組換取釣魚船

病題二首

性靈慵懶百無能唯被朝參遣夙興聖主優容恩未答丹經疎闊病相陵脾傷對客偏愁酒眼暗看書每愧燈進與時乖不知退可憐身計謾騰騰

人間多事本難論况是人間懶慢人不解養生何怪病已能知命敢辭貧向空咄咄煩書字與世滔滔莫問津金馬門前君識否東方曼倩是前身

寄江州蕭給事

夕郎憂國不憂身今向天涯作逐臣魂夢暗馳龍闕曙囁

吟閑繞虎谿春朝車載酒過山寺諫紙題詩寄野人惆悵
儒夫何足道自離羣後已同塵

和州酬江中丞見寄

賈傅南遷久江關道路遙北來空見雁西去不如潮鼠穴
依城社鴻飛在次寥高低各有處不擬更相招

和鍾郎中送朱先輩還京垂寄

分司洗馬無人問詞客殷勤輟棹過蒼蘚滿庭行徑小高
梧臨檻雨聲多春愁盡付千杯酒鄉思遙聞一曲歌且共
勝遊消永日西岡風物近如何

送郝郎中爲浙西判官

大藩從事本優賢幕府仍當北固前花繞樓臺山倚郭寺
臨江海水連天恐君到卽忘歸日憶我遊曾歷二年若許

他時作閑伴殷勤爲買釣魚船

陪王庶子遊後湖涵虛閣

東宮園

懸圃清虛乍過秋看山尋水上茲樓輕鷗的的飛難沒紅
葉紛紛晚更稠風卷微雲分遠岫浪搖晴日照中州躋攀
况有承華客如在南皮奉勝遊

柳枝辭十二首

把酒憑君唱柳枝也從絲管遠相隨逢春只合朝朝醉記
取秋風葉落時

南園日暮起春風吹散楊花雪滿空不惜楊花飛也得愁
君老盡臉邊紅

陌上朱門柳映花簾鈎半捲綠陰斜憑郎暫駐青驄馬此
是錢塘小小家

夾岸朱顏柳映樓綠波平慢帶花流歌聲不出長條密忽
地風回見綵舟

老大逢春揔恨春綠楊陰裏最愁人舊遊一別無因見嫩
葉如眉處處新

濛濛堤岸柳含煙疑是陽和二月天醉裏不知時節改漫
隨兒女打鞦韆

水閣春來乍減寒曉粧初罷倚欄干長條亂拂春波動不
許佳人照影看

柳岸煙昏醉裏歸不知深處有芳菲重來已見花飄盡惟
有黃鸞轉樹飛

此去仙源不是遙垂楊深處有朱橋共君同過朱橋去密
映垂楊聽洞簫

暫別揚州十度春不知光景屬何人一帆歸客千條柳腸
斷東風楊子津

仙樂春來按舞腰清聲偏似佯嬌嬈應緣鸞舌多情賴長
向雙成說翠條

鳳笙臨檻不能吹舞袖當筵亦自疑唯有美人多意緒解
衣芳態畫雙眉

貶官秦州出城作

浮名浮利信悠悠四海干戈痛主憂三諫不從爲逐客一
身無累似虛舟滿朝權貴皆曾忤繞郭林泉已徧遊惟有
戀恩終不改半程猶自望城樓

過江

別路如何極離腸有所思登艫望程遠搖櫓過江遲斷岸

煙中失長天水際垂此心非橘柚不爲兩鄉移

贈維揚故人

東京少長認維桑書劔誰家入帝鄉一事無成空放逐故人相見重淒涼樓臺寂寞官河晚人物稀疎驛路長莫怪臨風惆悵久十年春色憶維揚

秦州道中却寄東京故人

風緊雨淒淒川迴岸漸低吳州林外近隋苑霧中迷聚散紛如此悲歡豈易齊料君殘酒醒還聽子規啼

得浙西郝判官書未及報聞燕王移鎮京口因寄此詩問方判官田書記消息

秋風海上久離居曾到劉公一紙書淡水心情長若此銀鈎蹤跡更無如嘗憂座側飛鴉鳥未暇江中覓鯉魚今日

京吳建朱郎問君誰共曳長裾

王三十七自京丞訪作此送之

失鄉遷客在天涯門揜苔垣向水斜只就鱗鴻求遠信敢言車馬訪貧家烟生柳岸將垂縷雪壓梅園半是花惆悵明朝樽酒散夢魂相送到京華

寒食成判官丞訪因贈

常年寒食在京華今歲清明在海涯遠巷蹋歌深夜月隔墻吹管數枝花鴛鴦得路音塵濶鴻雁分飛道里賒不是多情成二十斷無人解訪貧家

送客至城西望圖山因寄浙西府中

牧叟鄰生笑語同莫嗟江上聽秋風君看逐客思鄉處猶在圖山更向東

九日雨中

茱萸房重雨霏微去國逢秋此恨稀目極暫登臺上望心
遙長向夢中歸荼蘼路遠愁霜早兄弟鄉遙羨雁飛唯有
多情一枝菊滿杯顏色自依依

寄外甥苗仲武

放逐今來瘴海邊親情多在鳳臺前且將聚散為閑事須
信華枯是偶然蟬噪疎林村倚郭鳥飛殘照水連天此中
惟欠韓康伯共對秋風詠數篇

寄從兄憲兼示二弟

別路吳將楚離憂弟與兄斷雲驚晚吹秋色滿孤城信遠
鴻初下鄉遙月共明一枝棲未穩回首望三京

附書與鍾郎中因寄京妓越賓

暮春橋下手封書海陵橋名寄向江南問越姑不道諸郎少歡
笑經年相別憶儂無

亞元舍人不替深知猥貽佳作三篇清絕不敢輕酬

因為長歌聊以為報未竟復得子喬校書示問故

兼寄陳君庶資一笑耳

海陵城裏春正月海畔朝陽照殘雪城中有客獨登樓遙

望天邊白銀闕天帝以黃金白銀為宮闕白雲闕下何英英雕鞍繡轂

趨承明閭門曉闕旌旗影玉墀風細佩環聲此處追飛皆

俊彥當年何事容疵賤懷鈔書坐紫微宮焚香夜直明光

殿王言簡靜官司閑朋好殷勤多往還新亭風景如東洛

却嶺林泉似北山光陰暗度盃盃裏職業未妨談笑間有

時邀賓復攜妓造門不問都非是酣歌叫笑驚四隣賦筆

縱橫動千字任他銀箭轉更籌不怕金吾司夜吏可憐諸
貴賢且才時情物望兩無猜伊余獨稟狂狷性編量多言
仍薄命吞舟可漏豈無恩負乘自貽非不幸一朝削跡爲
遷客且暮青雲千里隔離鴻別鴈各分飛折柳攀花兩無
色盧龍渡口問迷津瓜步山前送暮春去年三月三十日瓜步阻風
沙江上曾行路青林花落何紛紛漢皇昔幸回中道昇中
東元遊極目牛羊卧芳草舊宅重游盡曠荒故人相見多
之路 衰老禪智寺山光橋風瑟瑟兮雨蕭蕭行杯已醒殘夢斷
征途未極離魂消海陵郡中陶太守相逢本是隨行舊乍
申拜起已開眉却問辛勤還執手精廬外榭最清幽一稅
征車聊駐留閉門思過謝來客知恩省分寬離憂郡齋勝
境有後池山亭茵閣互參差有時虛左來相召舉白飛觴

任所爲多才太守能撾鼓醉送金船問歌舞酒酣耳熱眼
生花暫似京華歡會處歸來旅館還端居清風朗月夜窓
虛駸駸流景歲云暮天涯望斷故人書春來憑檻方歎息
仰頭忽見南來翼足繫紅牋墮我前引頸長鳴如有言開
緘試讀相思字乃是多情喬亞元短韻三篇皆麗絕小梅
寄意情偏切亞元詩云借問小梅應得信金蘭投分一何
堅銀鈎置袖終難滅醉後狂言何足奇感君知己不相遺
長卿曾作美人賦立成今有責躬詩銓去春醉中贈醉友
長歌酷爲喬君所賞
來篇所引報章欲託還京信筆拙紙窮情未盡珍重芸香
故以謝之陳子喬亦解貽書遠相問寧須買藥療羈愁只恨無書消
鄙吝子喬問藥物所要又游處當時靡不同歡娛今日兩
成空天子尚應憐賈誼時人未要嘲楊雄曲終筆閣緘封

已翩翩驛騎行塵起寄向中朝謝故人爲說相思意如此
送蒯司錄歸京

早年間有蒯先生二十餘年道不行抵掌曾論天下事折
腰猶悟俗人情老還上國歡娛少貧聚歸資結束輕遷客
臨流倍惆悵冷風黃葉滿山城

還過東都留守周公筵上贈座客

賈生三載在長沙故友相思道路賒已分中年甘寂寞豈
知今日返京華麟符上相恩偏厚隋苑留歡日欲斜明且
江頭倍惆悵遠山芳草映殘霞

送楊郎中唐員外奉使湖南

江邊微雨柳條新握節含香二使臣兩綬對懸雲夢日方
舟齊泛洞庭春今朝草木逢新曆昨日山川滿戰塵同是
多情懷古客不妨爲賦弔靈均

和表弟包穎見寄

平生中表最情親浮世那堪聚散頻謝朓却令歸省閣劉
楨猶自卧漳濱舊遊半似前生事要路多逢後進入且喜
新吟報強健明年相望杏園春

使浙西先寄燕王侍中

京江風靜喜乘流極目遙瞻萬歲樓喜氣龍蔥甘露晚水
煙波淡海門秋五年不見鸞臺長明日將陪兔苑遊欲問
平津門下吏相君還許吐茵不

驛中七夕

七夕雨初霽行人正憶家江天望河漢水館折蓮花獨坐
涼何甚微吟月易斜今年不乞巧鈍拙轉堪嗟

贈浙西顧稚官

盛府賓寮八十餘，閉門高卧興無如。梁王苑裏相逢早，潤浦城中得信疎。狼籍盃盤重會面，風流才調一如初。願君百歲猶強健，他日相尋隱士廬。

邵伯埭下寄南郵陳郎中

故人相別動經年，候館相逢倍惻然。顧我飲水難輟棹，感君扶病爲開筵。河灣水淺翹秋鷺，柳岸風微噪暮蟬。欲識酒醒魂斷處，謝公祠畔客亭前。

謫居舒州累得韓高二舍人書作此寄之

三峰煙靄碧臨谿，中有騷人理釣絲。會友少于分袂日，謫居多却在朝時。丹心歷歷吾終信，俗慮悠悠爾不知。珍重韓君與高子，殷勤書札寄相思。

舒人以潛曉天柱爲三峰

和張先輩見寄二首

去國離羣擲歲華，病容憔悴媿丹砂。谿連舍下衣長潤，山帶城邊日易斜。幾處垂鈞依野岸，有時披褐到鄰家。故人書札頻相慰，誰道西京道路賒。

清時淪放在山州，邛杖紗巾處處遊。日蒼茫悲鵬舍水，風陰濕弊貂裘。雞鳴候旦寧辭晦，松節凌霜幾換秋。兩首新詩千里道，感君情分獨知丘。

印秀才至舒州見尋別後寄詩依韻和

羈游白社身雖屈，高步詞場道不卑。投分共爲知己者，相尋多媿謫居時。離懷耿耿年來夢，厚意勤勤別後詩。今日谿邊正相憶，雪晴山秀柳絲垂。

送彭秀才

賈生去國已三年短褐閑行皖水邊盡日野雲生舍下有
時京信到門前無人與和投湘賦魏子來浮訪戴船滿袖
新詩好回去莫隨騷客醉林泉

移饒州別周使君

正憐東道感賢侯何幸南冠脫楚囚皖伯臺前收別宴喬
公亭下艤行舟四年去國身將老百郡徵兵主尚憂更向
鄱陽湖上去青衫憔悴淚交流

避難東歸依韻和黃秀才見寄

慙慙逢人問所之東流相送向京畿自甘逐客紉蘭佩不
料平民著戰衣樹帶荒村春冷落江澄霽色霧霏微時危
道喪無才術空首徘徊不忍歸

謝郭先輩

太原郭夫子行高文炳蔚弱齡負世譽一舉於月窟

仙籍及我竄羣舒向風心鬱鬱歸來暮江

上雲霧一披拂雷雨不下施猶作池中物念君介然氣感
時思奮發示我數篇文與我爭馳突綵褥粲英華理深剖
肌骨古詩尤精奧史論皆宏拔舉此措諸民何憂民不活
吁嗟吾道薄與世長迂濶顧我徒有心數奇身正詘論兵
屬少年經國須儒術夫子無自輕蒼生正愁疾

和集賢鍾郎中

石渠冊府神仙署當用明朝第一人腰下別懸新印綬座
中皆是故交親龍池樹色供清景浴殿香風接近鄰從此
翻飛應更遠徧尋三十六天春

送黃梅江明府

江前爲江夏今有善政今更幸小邑賦詩留別作此和之

封疆多難正經綸臺閣如何不用君江上又勞爲小邑篋
中徒自有雄文書生膽氣人誰信遠俗歌謠注不聞一首
新詩無限意再三吟詠向秋旻

和蕭郎中午日見寄

細雨輕風采藥時
簾隱几更何爲
豈知澤畔紉蘭客
來赴城中角黍期
多罪靜思如剝檠
赦書纔聽似含飴
謝公制勝常閑暇
願接西川敵手碁

送黃秀才姑熟辟命

世亂離情苦
家貧色養難
水雲孤棹去
風雨暮春寒
幕府才方急
騷人淚未乾
何時王道泰
萬里看鵬搏

送王四十五歸東都

海內兵方起
離筵淚易垂
憐君負米去
惜此落花時
想憶

承信相寬指後期
殷勤手中柳此是向南枝

夢游三首

魂夢悠揚不奈何
夜來還在故人家
香濛蠟燭時時暗
占映屏風故故斜
檀的慢調銀字管
雲鬟低綴折枝花
天明又作人間別
洞口春深道路賒

繡幌銀屏香靄間
若非魂夢到應難
曉前人靜偏宜夜
戶內春濃不識寒
蘸甲遮觴纖似玉
含詞忍笑膩於檀
錦書若要知名字
滿縣花開不姓潘

南國佳人字玉兒
芙蓉雙臉遠山眉
仙郎有約長相憶
阿母無猜不得知
夢裏行雲還倏忽
暗中攜手乍疑遲
因思別後閉牕下
織得迴文幾首詩

和翰長聞西樞副隣居夜晏

開筵別有隣居興卜夜應憐禁漏長舊友不期爭命駕新
姬憑寵刺傳觴香煙結霧籠金鴨燭焰成花照杏梁京邑
衣冠多勝賞鱸魚爭敢道思鄉

和清源太保寄湖州潘郎中

老大離羣一倍愁谿山風物且淹留醞成春酒誰斟酌抄
得新書自校讐莫似牧之矜曠達須教子重讓風流恩門
舊忿知難忘題取新詩上郡樓

送蒯員外東遊舊治

百歲猶強健知君卽地仙孤飛下華表太息問桑田故吏
今誰在高名昔共傳伊余亦遺老相送一潸然

送王監丞之歷陽

歎息曾逢處江邊故郡城青襟空皓首往事似前生綠綬

君重縮華簪我尚榮年衰俱近道莫話別離情

奉和武功學士舍人寄贈文懿大師

舊國荒涼成黍稷故交危脆似琉璃高人獨喜湯師在手
把新文數道碑

文似春花鋪曉陌思如泉涌注長江詩情道性知無夢頻
見殘燈照曙牕

已潔心源起世表却緣詩句有時名初聞行業如耆宿及
見容顏是後生

和錢祕監與邊

筵上詩題共筆牀樽前酒興話高陽心清自覺官曹簡院
靜先知節候涼南國少年推貴重東堂前輩讓賢良好看
雙鳳追飛處胡粉新塗紫界墻

送周郎中還司

憶在廬山始識君當時唯擬共眠雲那知身計關前定却
向人間逐世紛紫閣峰前欣欲往銀臺門裏歎離羣青囊
舊有登真訣莫遣閑人取次聞

送高先輩南歸

鄉國悲前事風光屬後生名從天上得身入故都行草色
初裁綬鵬飛不算程自憐枯朽思相送剩含情

送曾秀才

塗水神仙宅仙山夾縣樓吾孫好詩句歸詠故鄉秋紫竹
遮書幌紅蕉拂釣舟東堂有平路莫謁外諸侯

寄玉筍山沈道士

珍重江南沈鍊師未曾相識久相思已全真氣能從俗不

墜家風善賦詩玉筍共遊知早晚金貂回顧覺喧卑多慙
書札遙相問更望刀圭換白髭

和蕭少卿見慶新居

湘浦懷沙已不疑京城賜第豈前期鼓聲到晚知坊遠山
色來多與靜宜簪履尚應憐故物稻梁空自媿華池新詩
問我偏饒思還念鷓鴣得一枝

又和

驚蓬偶駐知多幸斷鴈重聯愜素期當戶小山如舊識上
墻幽蘚最宜清風不去因栽竹隙地無多也鑿池更喜
良隣有白楮綠陰分得近南枝

送彭秀才南遊

問君孤棹去何之玉筍春風楚水西山上斷雲分翠靄林

清雪入澄江
神相會道士
仙童手共攜
他日
時清更隨計
莫
劉阮洞
中迷

和移明上人
夜見寄

酌酒圍爐
久愁襟
默自增
長年逢歲暮
多病見兵興
夜色
開庭燎寒
威入硯
冰湯師
無別念
吟坐一燈凝

送從兄赴臨川幕

梁王籍寵就
東藩還
召鄒
枚坐兔園
今日好論
天下事
昔
年曾受主人恩
石頭城下
春潮滿
金柅亭
邊綠樹繁
唯存
音書慰離別
一杯相送別
無言

